



廿一史彈詞註卷之三上

成都楊 慎用修編著

漢陽張三異禹木增定

男仲璜別麓註 孫坦麟畫臣校

第三段 說秦漢 臨江仙

滾滾長江東逝水浪花淘盡英雄是非成敗轉頭空青  
山依舊在幾度夕陽紅 白髮漁樵江渚上慣看秋月  
春風一壺濁酒喜相逢古今多少事都付笑談中

詩曰

成敗興亡古至今飛雲去鳥入銷沉荒郊廢塚傷心  
處不待田文聽鼓琴

哈佛大學漢和  
圖書館珍藏印

記得東周併入秦回頭楚漢鬧乾坤時來驟雨推潢  
潦勢敗狂風捲片雲富貴一場鴛枕夢是非千載馬  
蹄塵殘山剩水年年在不見謀王圖霸人

剪雪裁冰詩有味降龍伏虎事曾聞夜來說到降龍  
處今日還尋伏虎人伏虎降龍輸好漢談今說古看  
書人休嫌短話成長話要把新文接舊文打虎金槌  
休換柄斬蛟寶劍再磨新斬蛟寶劍長三尺打虎金  
槌重九觔故典尋來知往事新詞說動長精神死灰  
撥火重生燄枯樹開花再遇春春去春來人易老花  
開花落可憐人不如忙裏偷閒好再把新詞聽一巡  
昨序說夏商周三代到周赧王被秦昭王逼獻國邑旋

滅東西周而周亡

秦之先原姓嬴氏周孝王時有非子者為主馬之官孝  
王封爲秦伯閱二世至秦仲其國始大傳之

莊公 襄公 文公 寧公 武公 德公

宣公 成公 穆公 康公 共公 桓公

景公 哀公 惠公 悼公 厲公 躁公

懷公 靈公 簡公 獻公 孝公 凡二十四

世孝公用商鞅之術富國強兵傳之子是稱惠文王傳  
之武王武王因舉鼎絕膺而死其弟名稷嗣位是爲昭  
王乙巳年滅周又六年薨其子孝文王即位三日而死  
傳其子莊襄王按莊襄王名楚先前納呂不韋之妾生

子名政莊襄王在位三年而亡其子政即位冒嬴氏之  
 姓甲寅年為始征伐六國二十年之後滅韓又滅趙滅  
 魏滅楚滅燕至庚辰年滅齊天下歸一自稱始皇帝晏  
 駕之日趙高殺其太子扶蘇立次子胡亥為二世皇帝  
 三年趙高弑之立扶蘇之子名子嬰降號為二世秦王  
 計誅趙高四十六日沛公入關降於軹道傍而秦亡隨  
 為楚項籍所殺又五年楚為漢滅天下定於一矣

漢高祖姓劉名邦平秦滅楚諸侯王奉即皇帝位  
 在位十二年傳之

惠帝	在位七年	呂后	前後少帝在位各四年
文帝	元年後元在位二十三年	景帝	元年中元後元在位十六年

武帝	建元太初元光元朔元狩元鼎元封	昭帝	始元元鳳元平
宣帝	本始地節元康神爵五鳳甘露黃龍在位二十五年	成帝	建始鴻嘉河平陽朔
元帝	初元永光建昭	哀帝	建平元壽
平帝	元始在位五年	孺子嬰	居攝在位三年

凡十三主共二百十一年是為西漢被外戚王莽所奪  
 莽毒弑平帝廢孺子嬰改國號曰新篡位十八年漢兵  
 起奉宗室劉元為帝名曰更始誅莽即位三年為赤眉  
 所奉劉盆子所滅降封淮陽王盆子兵敗降於光武

光武皇帝劉秀者南陽宗室出景帝之裔大戰昆陽誅  
 莽

王莽斬王郎平赤眉等寇神武中興建武位三十三年中元在傳

之明帝永平在位十八年章帝建初位在位十三年章

和帝永元元興在位十七年殤帝延平位在位一年

安帝永初元初永寧建元延光在位十九年

順帝永建陽嘉永和漢安建康在位十九年

冲帝永嘉在位一年質帝本初在位一年

桓帝建和和平元嘉永康在位二十二年

靈帝建寧熙平元和獻帝初平興平建安在位三十一年

凡十二主共一百九十五年天下魏蜀吳三分

秦始皇至漢獻帝通共四百三十三年中間覆雨翻雲

幾場興廢談論間不能細說略將大槩品題

### 七戰國秦昭王英雄獨霸

秦嬴昭襄王名稷秦武王之異母弟也質於燕武王好力戲舉鼎絕脈而死無子魏冉與國人迎稷立之將白起相范雎伐楚伐趙六國質子獻城咸有帝秦之意七國註見二段七暴國下秦嬴註見二段非子封秦下

### 奪周朝取世界遷徙周民

昭王攻周赧王盡獻其邑周民不樂屬秦東亡於鞏秦收其寶器遷西周公於黽狐聚南即古梁城 黽音憚 黽狐聚在洛陽

### 昭王死子孝文繼登三日

昭襄王薨子孝文王名柱即位三日而薨

### 奄然間無疾病做了亡人

莊襄王恰三年龍牀未煖

莊襄王名楚孝文王之子初質於趙因呂不韋之計歸秦為嗣即位三年薨諡法睿智克服曰莊辟地有德曰襄

### 棄羣臣亡化了結果嬴秦

楚死子政嗣政實不韋之子秦嬴氏之裔絕矣胡致堂曰孝文立三日薨莊襄立三年薨何其遽也呂不韋能以其子為秦王子豈不能疾去二君以其子為秦國王哉

### 秦始皇呂家兒根源不正

莊襄王名異人初質於趙陽翟大賈呂不韋適邯鄲見異人曰此奇貨可居乃說曰太子愛華陽夫人而無子子之兄弟二十餘人子居中不甚見幸不韋請以千金西游立子為嗣異人曰必如君策秦國與子共之不韋乃厚貲西見夫人姊說曰夫人愛而無子異人賢自知中子不得為適誠以此時拔之是異人無國而有國夫人無子而有子也夫人遂與太子約為嗣因請不韋傳之不韋娶邯鄲美姬與居知其有娠與異人飲見而請之不韋佯怒既而獻之期年生子政異人立姬為夫人邯鄲之圍異人亡赴秦軍遂

歸更名楚楚薨政嗣位年十三

翟秦邑今開封府禹州華陽宮名

陽

璜按史載始皇以呂易嬴蓋以期年而生子政為據解者曰人十月生此過二月踰常期故知為不韋子心竊疑之今讀朱青巖輯要云婦人胎氣以十月為滿不韋進姬於異人期年生子是納後兩月受胎何得謂知其有娠而獻之夫婦人有娠必一二月而後知又期年生政是始皇之生不幾上同堯禹下侔漢昭乎蓋秦以詐力併天下漢人惡其焚書坑儒因不韋私通於太后故遂以曖昧之事互相傳述以實之議事與晉以牛易馬皆無實據不得挾李園而議之也此論可解期年之疑而定呂嬴之案矣

### 呂不韋稱仲父於國何親

呂不韋封相國為文信侯號稱仲父後不韋以罪免相就國歲餘諸侯使者請之相望於道始皇恐其為變賜不韋書曰君何功於秦封河南十萬戶何親於秦號稱仲父徙處蜀飲酖死蜀今成都府

### 咸陽市懸千金誇張呂覽

初不韋為相國使其客集儒書著其所聞為十二紀八覽六論訓解各十萬言備天地古今萬物之事名

為呂氏春秋暴之咸陽市門懸千金其上有能增損一字者與之時人無能增損者高誘為序以為人非不能增損蓋憚相國畏其勢耳咸陽縣名屬西安府其地在山南水北山水皆陽故名咸陽

### 大陰人一場亂出醜難聞

初始皇年少太后與文信侯私通王壯文信侯恐事覺乃私求大陰人嫪毐詐為宦者進之生二子封毒為長信侯政事皆決於毒後有告毒非宦者下吏治罪毒發兵為亂始皇使相國昌平君攻毒獲之滅三族遷太后於雍殺其二子雍

### 承累世大威風消磨六國

秦自孝公以來累世窺周國富兵強雄吞六國至始皇承六世之餘烈亡二周而吞諸侯遂成一統

### 繫韓王削趙壤魏楚難存

秦十七年內史勝滅韓擄韓王安置潁川郡十八年命王翦伐趙趙使將軍李牧禦之秦厚賂趙嬖臣郭開言牧欲反趙王使趙蔥顏聚代牧翦大破趙軍克邯鄲擄趙王遷二十二年遣王翦子賁伐魏魏王假

降殺之滅魏二十三年王翦伐楚楚悉國中兵禦之翦擊破之殺其將軍項燕二十四年擄楚王負芻滅楚置楚郡潁川郡今開封

許昌楚郡今壽州賁音奔

### 滅燕國俘遼東如同刈草

秦十九年擄趙王遷趙公子嘉自立為代王與燕合兵抗秦二十年燕太子丹以荆軻劫始皇不克秦益發兵就王翦於中山與燕代戰於易水西遂拔薊燕王走遼東斬丹以獻秦秦復進兵攻之至二十五年王賁滅燕擄燕王喜

### 入臨淄蠡王建松柏飄零

二十六年秦王賁自燕南攻齊使陳馳誘齊王約封以五百之地賁猝入臨淄民莫敢格齊王建遂降秦遷之共處之松柏之間飢死齊人怨建聽賓客姦人

者客耶共今衛輝府輝縣

### 取百越却匈奴鞭笞天下

秦二十五年王剪自楚郡定江南降百越置會稽郡  
三十二年盧生入海還因奏錄圖書曰亡秦者胡也  
始皇乃遣蒙恬發兵三十萬北伐匈奴收河南地為  
四十四縣始皇專以刑威立國賈誼曰始皇履至尊  
而制六合執敲朴以鞭笞天下  
會稽郡今紹興府河南地今寧夏

### 罷諸侯置郡守撐達為君

丞相王綰等言燕齊荆地遠請立諸子為王以鎮之  
廷尉李斯曰周封同姓甚眾攻擊如讐敵天子弗能  
禁今海內一統皆為郡縣其足易制置諸侯不便  
始皇是其議分天下為三十六郡郡置守尉監

### 自稱為始皇帝革除謚法

始皇自以德過三皇功高五帝乃更號曰皇帝又除  
謚法曰死而以行為謚是子議父臣議君也自今以  
來除謚法朕為始皇帝後以數計  
二世三世至於萬世傳之無窮

### 登泰山大封禪立石銘勳

始皇東行郡縣上鄒嶧山立石頌功德魯儒生議封  
禪議各乖異始皇絀儒生而除車道上自山陽至巔

封泰山立石頌德從陰道下禪於梁父封藏皆秘之  
世不得而記也積土為封謂負土於泰山上為壇  
而祭之除地為壇祭於梁父後改壇曰禪廣長十二  
丈壇高三尺階三等而樹石泰山之上高二丈一尺  
廣三尺凡封禪用玉牒書藏方石有玉檢又用石檢  
十枚列於石傍檢用金繩纏以五周以水銀和金為  
泥封之印以受命之璽又有玉匱一長一尺三寸以  
藏上帝之冊金匱二藏帝之冊泰山在濟南府泰安  
州北三里即東嶽岱宗也山高四十餘里有石表東  
嶽廟封神壇鄒嶧山在兗州府鄒縣東南二十五里  
即嶧山也梁父泰山下小山在泰安州  
東南一百一十五里漢書以此山名縣

### 造鐘鑲鑄金人銷除兵器

收天下兵器聚咸陽銷以為鐘鑲鑄金人十二置宮  
庭中周禮梓人為筍虞樂器所縣橫曰筍植曰鑲  
其聲大而宏則於鐘宜若是者以為鐘虞是故擊其  
所縣而由其虞鳴始皇二十六年有大人十二見於  
臨洮身長五丈足履六尺皆夷狄服始皇以為瑞乃  
銷兵器鑄為金人象之各重千石坐高二丈號曰翁  
仲一書云始皇使阮翁仲將兵守臨洮聲振匈奴翁  
仲死遂銅鑄其形像置咸陽宮司馬門外匈奴至有



見之者猶以為生  
錄與虞通音巨

### 坑儒生焚聖典殄滅斯文

李斯上書曰今天下已定法令出一諸生不師今而學古聞令下則各以其學議之入則心非出則巷議臣請天下有藏詩書百家語者皆誦守尉燒之偶語詩書者棄市以古非今者族所不去者醫藥卜筮種樹之書欲學法令者以吏為師制曰可會侯生盧生相與譏議因亡去始皇大怒曰諸生或為妖言以亂黔首使御史按問之諸生轉相告引乃自除犯禁者四百六十餘人皆坑之咸陽一書云秦既焚書諸儒多謗怨召諸生至者皆拜為郎凡七百人乃密令冬月種瓜於銅谷中溫處瓜有實詔下博士諸生說之人人各異乃命就眎之先為伏機諸生各相難不能決因發機填之以土焚書坑在驪山下即坑儒谷

### 填大海建阿房蓬萊求藥

始皇作石橋欲通海看日出處有神人驅石入海石去不速神輒鞭之流血又東巡幸遇秦橋之水率百官以下人提一石以填之俄而橋成如履平地又以咸陽人多先王宮庭小乃營朝宮渭南上林苑中先

作前殿阿房東西五百步南北五十丈上可坐萬人下可建五丈旗周馳為閣道自殿下直抵南山表山巔以為闕複道渡渭屬之咸陽隱宮徒刑者七十餘萬人分作阿房驪山關中計宮三百關外四百餘盧生說始皇所居宮觀復道相連帷帳鐘鼓美人充之所陽三百里內宮觀復道相連帷帳鐘鼓美人充之所行幸有言其處者死初燕宋無忌羨門子高之徒稱有仙道形解消化之術自齊威宣燕昭玉皆信之使人入海求蓬萊方丈瀛洲云此三神山在渤海中仙人及不死藥在焉始皇東遊海上方士徐市等上書請得齋戒與童男童女求之於是發童男女數千人往船交海中皆以風為解曰未能至望見之焉道德經月中仙人宋無忌白擇圖云火之精曰宋無忌蓋其人火仙也羨門古仙人名子高阿曲也殿之四曲皆為房阿房宮名在西安府咸陽縣東二十五里渭南上林苑中驪山臨潼縣東南二里因驪戎所居故名山之麓溫泉所出

### 築長城修五嶺苦害生民

築長城起臨洮至遼東延袤萬餘里暴師於外十餘年畧取南越地置桂林南海象郡以謫徙民五十萬

成五嶺 臨洮縣臨洮水故名屬隴西郡隸陝西桂林今廣西桂林府南海今廣東廣州府象郡今廉州雷州等府皆是五嶺裴潛廣州記大庾始安臨賀桂陽揭陽唐書註云大庾嶺在虔州永明嶺白芒嶺在道州臘嶺在桂州各有小異

### 博浪沙飛金椎副車誤中

韓人張良五世相韓韓亡良散千金之產欲為報讐始皇東遊至陽武博浪沙中良令力士操鐵椎狙擊始皇誤中副車 陽武縣名屬開封府今縣南有博浪沙亭

### 十日索無踪影未免擔驚

良擊始皇不中始皇驚求弗得令天下大索十日

### 因巡狩至沙邱鑿輿晏駕

始皇東遊少子胡亥與李斯從至平原津病篤乃令趙高為書賜太子扶蘇與喪會咸陽而葬未付使者遂崩於沙邱 平原津今德州沙邱故城在萊州府掖縣

### 鮑魚車同載轉廝混尸靈

始皇崩秘不發喪棺載輻涼車中會暑輻車臭乃詔從官令車載一石鮑魚以亂其臭 輻涼車有牕牖閉則輻涼則涼

### 奸臣計暗圖謀扶蘇太子

趙高謂李斯曰扶蘇即位必用蒙恬為丞相君侯終不懷通侯之印明矣胡亥慈仁篤厚可以為嗣斯然之乃相與矯詔立胡亥為太子更為書賜扶蘇數以不能立功上書怨謗而恬不矯正皆賜死

### 可憐哉同恬毅賜死長城

始皇尊寵蒙氏蒙恬將兵長城蒙毅常居中謀議始皇病遣毅出禱山川未反而始皇崩趙高等遂矯詔賜蒙恬與扶蘇死扶蘇泣欲自殺恬曰陛下使臣守邊公子為監此天下重任也今一使者來安知其非詐復請而死未暮也扶蘇曰父賜子死尚安復請即自殺恬不肯死繫諸陽周還報亥欲釋恬會毅禱山川還高曰先帝欲立太子久矣而毅以為不可乃繫諸代亥至咸陽發喪襲位遂殺毅恬曰吾積功信於

秦三世矣今將兵三十餘萬其勢足以畔然而守義者不敢辱先人之教以不忘先帝也乃吞藥自殺陽周今真寧縣屬慶陽府代秦郡今山西大同府蔚縣

### 秦二世用趙高指鹿為馬

秦二世皇帝名胡亥以趙高為中丞相高欲專權恐羣臣不聽乃先設驗持鹿獻二世曰馬也二世笑曰丞相誤耶問左右或默或言鹿高陰中諸言鹿者以法後羣臣皆畏高莫敢言其過

### 獄李斯阿督責黃犬東門

陳勝等兵起二世數誚讓李斯居三公位如何令盜如此斯懼乃阿二世意對曰賢主能行督責以獨斷於上羣臣百姓救過不給何變之敢圖二世於是督責益嚴民益亂後趙高譖斯長男由守三川與盜通二世使人按驗斯上書言高罪又諫止阿房宮作者減四邊征戍轉運二世曰君不能禁盜又欲罷先帝所為下吏按罪屬高治之撈掠千餘斯誣服與由反狀論腰斬咸陽市斯顧謂其中子曰吾欲與若牽黃犬俱出上蔡東門逐狡兔豈可得乎遂父子相哭而夸三族 獄音堆癡也三川秦郡名今河南府上蔡

今縣屬汝寧府

### 望夸宮求王侯至於黔首

### 丞相命槩不許刃下亡身

趙高數言關東盜無能為及沛公攻武關二世使責高懼乃與其婿咸陽令閻樂將吏卒至望夸宮殿門殺衛令入射上幄坐帷二世召左右皆惶擾不闕樂前數二世曰足下驕恣誅殺無道天下皆畔其自為計二世曰吾願得一郡為王弗許願為萬戶侯又弗許願與妻子為黔首樂曰臣受丞相命為天下誅足下足下雖多言臣不敢報麾其兵進二世自殺武關在西安府商州東望夸宮秦所建在西安府東

### 子嬰起誅趙高力扶宗社

趙高立二世兄子子嬰為秦王子嬰與其二子謀曰趙高殺二世佯以義立我使我齋見廟我稱病不行高必自來來則殺之高果自往子嬰刺殺高夸其三族

王氣銷天命改換了乾坤

子嬰稱王  
四十六日

都只為二世君窮奢極欲

二世嘗曰人生世間譬猶騁六驥過決隙吾  
欲極耳目之好窮心志之樂以終吾年壽

視蒼生如草芥重法嚴刑

趙高謂二世曰陛下刻法而嚴刑則高枕肆志  
寵樂矣二世乃更為法律務益深刻更音庚

發戍卒動人心罾魚變亂

二世發閭左戍漁陽九百人屯大澤鄉楚陽城人陳  
勝陽夏人吳廣皆為屯長欲謀舉事乃丹書帛曰陳  
勝王置人所罾魚腹中卒買魚烹食得腹中書怪之  
會天大雨道不通度已失期乃召令徒屬曰公等皆  
失期當斬壯士不死則已死則舉大名耳王侯將相  
寧有種乎眾皆從之遂起兵秦時復除者居閭里  
之左今力役煩在閭左者盡發之戍屯兵以守也漁  
陽今順天府薊州大澤鄉在徐州豐縣北陽城今宿

州陽夏今大康  
縣屬開封府

假狐鳴煽惑起廣勝張陳

陳勝又令吳廣於叢祠中夜篝火作狐鳴曰大楚興  
陳勝王卒皆驚恐勝乃詐稱公子扶蘇楚將項燕為  
壇而盟稱大楚勝自立為將軍廣為都尉比至陳率  
數萬人入據大梁張耳陳餘詣門上謁勝大喜陳中  
父老請立勝為楚王勝以問耳餘對曰將軍始至陳  
而王之示天下私願將軍急引兵而西遣人立六國  
後為秦益敵敵多則力分與眾則兵強誅暴秦據咸  
陽以令諸侯則帝業成矣勝不聽自立為王稱張楚  
以廣為假王陳

州名屬開封府

趙武臣魏王咎人人舉事

陳王以陳人武臣為將軍以耳餘為左右校尉狗趙  
又令魏人周市狗魏武臣行收兵得數萬人下趙三  
十餘城耳餘乃說武臣自立為趙王  
周市畧定魏地立魏公子咎為魏王

齊田儋燕韓廣處處分爭

齊田儋燕韓廣處處分爭

田儋故齊王族也與從弟榮橫皆豪健周市狗地  
狄儋殺狄令而召豪吏子弟曰諸侯皆反秦自立齊  
古之建國也儋田氏當王遂自立擊市走之略定齊  
地趙將韓廣畧燕燕豪傑共立以為燕王 狄今樂  
安縣屬  
青州府

### 劉沛公項重瞳興兵輔楚

沛人劉邦字季初為泗上亭長會陳勝兵起沛父老  
殺沛令迎季立為沛公掾主吏蕭何曹參等為季收  
沛子弟得三千人欲以應楚楚將項燕子梁嘗殺人  
與兄子籍避讐吳中會稽守殷通欲應勝梁使籍斬  
通舉吳中兵收下縣得精兵八千人亦欲應楚楚  
莊賈弒勝降秦陳人秦嘉起兵於郟乃立景駒為楚  
王廣陵人召平為楚狗廣陵聞陳王敗乃拜梁為上  
柱國引兵擊秦梁遂以八千人渡江而西梁曰陳王  
首事戰不利未聞所在秦嘉立景駒大逆無道乃進  
擊嘉駒殺之召別諸將至薛計事沛公亦往焉居郟  
人范增年七十好奇計說梁曰楚雖三戶六秦必楚陳勝不  
楚人憐之故楚南公曰楚雖三戶六秦必楚陳勝不  
立楚後而自立其勢不長今君起江東楚蠶起之將  
皆爭附者以君世世楚將能復立楚後也梁乃求得

楚懷王孫心立為楚懷王都盱眙後梁與秦將章邯  
戰敗死懷王號羽為魯公章邯擊趙羽將兵救趙大  
破秦兵遂以羽為上將軍 項籍字羽目重瞳沛今  
徐州沛縣秦法十里一亭亭置長主督盜賊泗水亭  
在沛縣東郊今淮安府海州廣陵今揚州府薛故城  
在滕縣居鄆今巢縣屬無為州三戶漳水津也在相  
州濰陽縣界盱眙  
縣名屬鳳陽府

### 子房公能趁勢復立韓成

初項梁立楚後張良因說梁曰君已立楚後而韓諸  
公子橫陽君成最賢可立為王益樹黨梁立成為韓  
王以良為司徒西畧韓地 張良字子  
房其先韓人家禹州封留侯謚文成

### 六戰國惡喂喂重興舊業

先六國為秦滅至是楚始立懷王孫心為楚懷王趙  
王武臣為將李良所殺張耳陳餘復立趙歇為趙王  
魏咎為秦敗自殺楚立魏豹為魏王田儋為秦章邯  
所殺齊人復立田假為王儋弟榮逐假立儋子市為  
齊王韓廣為燕  
王韓成為韓王

笑談間齊響應變了民心

時郡縣苦秦法爭殺長吏以應

劉沛公入關陝秦降軹道

楚王遣沛公伐秦沛公北擊昌邑西過高陽下陳留南取潁川因張良畧韓地良引兵從沛公畧南陽南陽守降遂入武關秦將距嶢關沛公大破之遂至霸上秦子嬰素車白馬繫頸以組降軹道傍昌邑故城在兗州府金鄉縣界高陽里名在開封府杞縣西陳留縣名屬開封府潁川秦郡名今屬開封南陽今南陽府府嶢關今西安藍田縣霸上在西安府城東軹道在城東一十三里

楚項羽過驪宮一火而焚

項羽既定河北率諸侯兵西入關掘始皇塚燒秦宮室火三月不絕

殺子嬰屠咸陽冰消瓦解

羽引兵西屠咸陽殺秦降王子嬰擄寶貨婦女而東秦民大失望

老亞夫撞玉斗賭鬪鴻門

初沛公入關或說沛公遣兵守函谷無內諸侯軍沛公從之項羽至攻破之欲擊沛公時羽在鴻門沛公在霸上范增說羽急擊勿失羽季父項伯素善張良夜馳告之欲與俱去良曰有急亡去不義因固邀伯入見沛公沛公曰吾籍吏民封府庫而待將軍所以守關者備他盜耳豈敢反乎伯曰且日不可不早來謝歸具以告羽且曰沛公先破關中公豈敢入乎人有大功而擊之不義羽然之且日沛公見羽鴻門羽留飲增數目羽舉所佩玉玦示之者三羽不應須臾沛公起如廁間行趨霸上留良謝羽因以白璧一雙獻羽玉斗一雙與增羽受璧增拔劍撞破玉斗曰唉豎子不足與謀奪將軍天下者必沛公也范增羽尊為亞夫函谷在河南府新安縣東鴻門地名在臨潼縣東舊有鴻門亭項伯名纏字伯陵唉音哀

樊驂乘啗屍肩沐猴奪氣

初增目羽殺沛公羽不應增乃使項莊舞劍欲擊沛公項伯亦拔劍舞以身翼蔽沛公張良出謂樊噲曰項莊舞劍意在沛公噲即帶劍擁盾直入瞋目視羽髮指眦盡張羽目之問為誰張良曰沛公驂乘樊噲也

羽曰壯士賜之斗酒一生彘肩噲立飲啗之噲曰秦有虎狼之心天下皆畔沛公先破秦入咸陽毫毛不取近還軍霸上以待將軍勞苦功高未有封賞之爵而聽細人之說欲誅有功之人此亡秦之續耳羽無以應後韓生說羽曰關中四塞之地可都而霸羽見秦宮室皆已燒殘又思東歸曰富貴不歸故鄉如衣繡夜行耳韓生退曰人言楚人沐猴而冠果然張晏曰沐猴獼猴也雖著人衣冠心不類人索隱曰言獼猴不任久著衣冠以喻楚人性躁暴關中東有函谷關南有峽關中東有函谷關西有散關北有蕭關居四關之中故名關中東有函谷浦津龍門合河等關南有南山及武關峽關西有大隴山及隴山大震烏蘭等關北有黃河南塞是謂四塞之地樊噲封舞陽侯

### 護真龍四猛士疆信侯嬰

先是范增說羽曰沛公其志不小吾使人望其氣皆為龍成五彩此天子氣急擊勿失至是沛公從百餘騎見羽鴻門增使項莊舞劍樊噲直入羽賜以酒有頃沛公起如廁招樊噲出置車官屬獨騎與樊噲靳疆滕公紀成步從間道走軍張晏曰紀通紀信曰紀成紀通父以成死事故封侯張晏曰紀通紀信

子按此則紀成即紀信也  
滕公封汝陰侯紀信廣安人

### 封漢王用賢才築壇拜將

項羽疑沛公業已講解又惡負約因立沛公為漢王王巴蜀漢中都南鄭初淮陰人韓信仗劍從項梁梁敗數以策干羽不用亡歸漢為連敖坐法當斬滕公救之言於王以為治粟都尉信數與蕭何語何奇之王至南鄭將士思歸多道亡者信以王不我用亦亡去何聞追之人言於王曰丞相何亡居一二日何來謁王曰若亡何也曰臣追亡者韓信王曰諸將亡者以十數無所追信詐也何曰諸將易得耳如信國士無雙王欲長王漢中無所事信必欲爭天下非信無可與計事者王曰吾亦欲東耳乃召信拜為大將何請設壇具禮諸將皆喜人人以為得大將至拜乃信也一軍皆驚禮畢上坐王與語大喜自以為得信晚巴今保寧府蜀今成都府南鄭縣名屬漢中府淮陰今淮安府

### 蕭丞相書六律約法安民

初蕭何從沛公入關獨取秦相府律令圖書藏之及沛公至霸上召父老謂曰父老苦秦苛法久矣諸侯

約先入關者王之吾當王關中與父老約法三章耳  
殺人者死傷人及盜抵罪餘悉除去吏民安堵如故  
秦民大喜後以蕭何為丞相攬撫秦法取其宜於時  
者作律九章何以功第一封鄼侯為開國名相蕭  
何沛之豐人謚文終據君  
去聲撫音職攬撫收拾也

### 韓元帥使機謀明修棧道

初張良說漢王燒絕所過棧道以示項羽無東意至  
是以韓信為元帥將兵出定關中故修棧道以示出  
兵之緩路險不容行架木為棚而渡名曰棧  
道在漢中府褒城東北棧音剪又贊上聲

### 度陳倉逞手段席捲三秦

初項羽三分關中以秦降將章邯為雍王司馬欣為  
塞王董翳為翟王距塞漢路謂之三秦至是信明修  
棧道暗度陳倉引兵從故道出襲雍雍王邯戰敗走  
塞王欣翟王翳皆降雍今鳳翔縣塞名桃花林在  
河南府靈寶縣西至潼關翟本上郡今延安府陳倉  
秦縣名今鳳翔府寶雞縣故道今兩當縣屬鞏昌府

### 擄魏豹斬陳餘生擒夏說

先是羽徙魏王豹為西魏王徙趙王歇為代王立張  
耳為常山王徙齊王市為膠東王齊將田都為齊王  
以田榮不從楚擊秦故不封榮榮聞羽徙市而立都  
為齊王大怒擊都走之擊殺市遂并王三齊羽又以  
陳餘不從入關封餘三縣餘怒使人說齊王榮資餘  
兵擊常山復趙王齊與共襲常山耳亡走漢餘迎代  
王歇復王趙歇立餘為代王餘留傅趙王而使成受  
君夏說守代至是漢王使韓信擊魏魏王豹盛兵蒲  
阪以塞臨晉信乃益為疑兵陳船渡臨晉而伏兵從  
夏陽以木罌渡軍襲擄豹遂定魏地信使人請兵三  
萬願以北舉燕趙東擊齊南絕楚糧道西與漢王會  
於滎陽漢王乃遣張耳與俱信進擊代兵破之擒代  
相夏說引兵擊趙趙王歇與成安君陳餘聚兵井陘  
口廣武君李左車曰井陘之道車不得方軌騎不得  
成列願假臣兵從間道絕其輜重足下高壘勿戰不  
十日而兩將之頭可致麾下不聽信乃引兵下未至  
井陘口三十里止舍夜選輕騎二千人人持一赤幟  
從間道望趙軍誠曰趙見我走必空壁逐我若疾入  
趙壁拔趙幟立漢赤幟乃出背水陣趙軍望見大笑  
信鼓兵出井陘口趙開壁擊之信佯走水上軍趙果  
空壁逐之水上軍皆死戰不可敗信所出奇兵馳入  
趙壁皆拔趙幟立漢赤幟趙軍歸見幟大驚遂亂遁



走漢兵夾擊斬代王陳餘擒趙王歇  
屬平陽府臨晉縣名屬蒲州夏陽今韓城縣屬西安  
府滎陽縣名屬鄭州井陘縣名屬真定府所背之水  
泚水也在真定府臨城縣西北二十五里  
左車行  
唐人

### 嚇燕書囊沙計四海馳名

信既破趙以千金募生得李左車解其縛師事之問  
曰僕欲北攻燕東伐齊若何左車曰將軍擄魏王豹  
誅成安君威震天下然欲舉倦敝之兵頓之燕堅城  
之下曠日持久糧食單竭燕既不服齊必自強為將  
軍計莫若按甲休兵遣辨士奉書於燕燕必不敢不  
從燕從而東臨齊雖有智者亦不能為齊計矣信從  
其策燕從風而靡信遂東擊齊楚使龍且救之且與  
信夾維水而陣信夜令人囊沙壅水上流旦引兵半  
渡擊且佯敗走還且喜曰吾固知信怯也遂追之信  
使人決壅囊水大至且軍大半不得渡急擊殺且擄  
齊王廣 維水源出青  
州府莒州 且音沮

### 追霸王至烏江奇謀妙算

初項羽自立為西楚霸王至是楚與漢約中分天下  
羽解而東歸漢王追羽至固陵韓信彭越皆引兵來  
乘駿馬從八百餘騎潰圍南出馳至陰陵迷失道田  
父給曰左乃陷大澤中漢追及之至東城止有二十  
八騎羽謂其騎曰吾起兵八歲身七十餘戰未嘗敗  
北今卒困於此此天亡我也於是欲東渡  
烏江亭長艤船待曰江東雖小亦足王也羽曰天之  
亡我我何渡為且籍與江東子弟八千人渡江而西  
今無一人還縱江東父兄憐而王我我何面目見之  
乃自刎而死楚地遂定 固陵今光州固始縣垓堤  
名在鳳陽府虹縣西陰陵今無為州東城在濠州烏  
江浦名在和州東四里西楚孟康曰舊名江  
陵為南楚吳為東楚彭城為西楚 垓音該

### 趕田橫歸海島許大勳

初信破齊擄齊王廣田橫後自立為齊王聞項羽已  
滅橫懼誅與其徒五百餘人入居海島中後漢召橫  
橫與二客乘傳降漢未至三十里自刎橫既葬二客  
亦自刎島中五百餘人亦自殺 海島在萊州府即  
墨縣  
西北

扶助起漢高皇獨稱赤帝

天下既定漢王始即帝位是為太祖高皇帝初帝嘗被酒夜經澤中有大蛇當徑帝拔劍斬蛇有老嫗夜哭曰吾子白帝子也化為蛇當道今赤帝子斬之秦居西屬金金色白故曰白帝子劉堯後堯火德故稱赤帝子澤中在徐州

豐縣西今名斬蛇溝

璜按升菴稱韓元帥使機謀逞手段席捲生擒四海馳名奇謀妙算許大功勳等語皆盛贊韓信之功之大也又云扶助漢高獨稱赤帝蓋因項羽曾使武涉說信欲與連和三分天下信謝之曰漢王授我上將軍印言聽計用夫人親信我我倍之不祥雖死不易武涉去蒯徹知天下權在信乃說之曰今兩主之命懸於足下莫若兩利而俱存之三分天下信曰漢王遇我厚吾豈可以鄉利而倍義乎徹曰足下必漢王之不危已亦誤矣野獸盡而獵狗烹願足下深慮之信不忍倍漢又自以功多漢終不奪我信遂謝徹此升菴扶助獨稱四字不特贊信功且原信心而深有憾於三族之夸也蒯徹字通涿郡人

仗三傑鋤暴楚嫚語分羹

帝西都洛陽置酒南宮問諸將曰吾所以有天下項氏所以失天下者何王陵等對曰陛下使人攻城畧地因以與之項羽有功者害之賢者疑之此所以失天下也帝曰公知其一未知其二夫運籌幃幄之中決勝千里之外吾不如子房鎮國家撫百姓給餽餉不絕糧道吾不如蕭何連百萬之眾戰必勝攻必取吾不如韓信三者皆人傑吾能用之此所以取天下也項羽有一范增而不能用人所以為我擒也初帝為漢王將兵伐楚入彭城為羽所破與數十騎遁去太公呂后為楚軍所獲羽置軍中為質後楚漢俱軍廣武羽為高祖置太公其上曰今不急下吾烹太公王曰吾與若俱受命懷王約為兄弟吾翁即若翁必欲烹而翁幸分我一杯羹羽怒欲殺之項伯曰為天下者不顧家殺之何益祇益禍耳得免彭城今徐州廣武城名在開封府河陰縣北史載高祖父曰太公母曰媪皇甫謐曰太公名執嘉又名端媪姓王索隱曰母温氏打得班固泗上亭長古石碑可據

印銷鑄霎時間轉環借箸

初楚數敗漢漢王與酈食其謀撓楚權食其曰秦伐諸侯滅其社稷大王誠能立六國後其君臣百姓必

皆戴德慕義楚必斂衽而朝王曰善趣刻印欲行張  
良來謁王方食具以告良良曰臣請借前箸為大王  
籌之天下遊士離親戚棄墳墓從大王遊者徒欲望  
咫尺之地今復立六國後遊士各歸事其主大王誰  
與取天下乎王輟食吐哺罵曰豎儒幾敗乃  
公事今趣銷印 酈音歷食音異其音基

### 斬丁公赦季布賞罰分明

初楚人季布為項羽將數窘辱帝帝以千金購布匿  
者罪三族布乃髡鉗為奴自鬻於魯朱家朱家心知  
其季布也買置田舍身之洛陽見滕公曰季布何罪  
臣各為其主且今上始得天下而以私怨求一人何  
示不廣也滕公言於帝乃赦布召拜郎中朱家遂不  
復見之布母弟丁公亦為羽將逐窘帝於彭城西短  
兵相接帝急顧曰兩賢豈相厄哉丁公乃還至是來  
謁帝以徇軍中曰丁公為臣不忠使項氏失天下遂  
斬之曰使後世為人臣無效丁  
公也 丁公名固薛人厄音阨

### 太疑心老相國自污田宅

陳豨初反帝往擊之呂后與蕭何以計誅韓信上聞  
使使拜何為相國益封五千戶人皆賀召平獨弔曰

上暴露於外而君守於內非被石矢之難而益封君  
置衛非以寵君也以今者淮陰新反有疑君心願君  
讓封勿受悉以家財佐軍何從之上說其秋豨布反  
帝自將擊之數使使問相國何為客又說何曰君滅  
族不久矣君入關中得民心十餘年上所為數問君  
畏君傾動關中今君胡不多買田地賤賞貨以自污  
上心必安何從之帝還百姓遮  
道訴相國帝大悅 豨音僖

### 因乘勝擊冒頓幾困平城

帝封韓王孫信為韓王都馬邑匈奴寇邊信以馬邑  
降帝自將擊信破其軍信亡走匈奴帝聞冒頓居代  
谷使人覘之冒頓匿其壯士肥馬使者皆言可擊復  
使劉敬往敬還報曰兩國相擊此宜矜夸今臣徒見  
羸瘠老弱此必欲見短伏奇兵以爭利愚以為不可  
擊帝怒以敬妄言沮軍械繫敬廣武帝先至平城兵  
未盡到冒頓縱精兵四十萬騎圍帝於白登十日帝  
用陳平計使畫工圖美女間遣人說單于妻閼氏云  
漢有美女欲獻之閼氏畏奪已寵謂單于曰漢天子  
亦有神靈得其土地非能有于是單于開其一角得  
突出帝至廣武赦敬封為建信侯一書云漢高祖平  
城之圍其城一面即冒頓妻閼氏兵強於三面陳平

訪知關氏妬忌造木偶人運機關舞埤間闕氏望見  
謂是生人慮下城冒頓必納之遂退兵乃得出此鬼  
備之始也 匈奴單于頭曼有太子曰冒頓自立為  
單于馬邑縣名屬大同府代谷今大同府蔚州廣武  
故城在太原府代州平城在大同府東白登山名上  
有臺在大同府城東闕氏音烟支匈奴皇后號 按  
韓王名信都今史止云封信為韓王而遺去都字使  
其名姓全同淮陰前輩謂史公疎漏此也冒頓音默  
特

### 用陳平出奇計偽遊雲夢

初帝破楚更立齊王韓信為楚王人有告信反者帝  
問陳平平曰古者天子巡狩會諸侯陛下弟出偽遊  
雲夢會諸侯於陳陳楚之西界信必迎謁詢而擒之  
特一力士事耳帝乃告諸侯會陳南遊雲夢帝及至  
陳信謁帝帝令武士縛信信曰果若人言狡兔死走  
狗烹高鳥盡良弓藏敵國破謀臣亡天下已定我固  
當烹帝曰人告公反遂械繫信以歸至洛陽赦信封  
淮陰侯平佐帝凡六出奇計請捐金行反問一也以  
惡草具進楚使二也夜出女子二千入解滎陽圍三  
也躡足請封齊王信四也請偽遊雲夢五也解白登

之圍六也 雲夢澤名在湖廣安陸府南 陳平字  
孺子封曲逆侯謚曰獻陽武戶牖鄉人曲逆今保定  
府完縣

### 信呂后誅大將蒞醢功臣

帝以陽夏侯陳豨為代相國監趙代邊兵豨遂反帝  
自擊之韓信稱病不從擊豨其舍人得罪於信信欲  
殺之其弟上變告信陰與豨通謀呂后與蕭何謀詐  
言豨已敗死給信入賀信入后使武士縛信斬之遂  
滅三族帝初擊豨徵兵於梁梁王彭越稱病帝怒讓  
之其將扈輒勸王反王不聽梁太僕得罪走漢告越  
輒謀反帝使使掩王囚之洛陽有司治反形已具赦  
為庶人傳處蜀至鄭呂后從長安來王涕泣自言無  
罪后與俱至洛陽白帝曰彭王壯士今徙之蜀此自  
遺患不如誅之遂滅三族梟越首洛陽醢其肉以賜  
諸侯淮南王英布聞信越被誅大懼亦反帝自將擊  
敗之布走江南長沙王臣使人誘與走越殺之 淮  
南故城在廬州  
府舒城縣東南  
璜按高帝追羽至固陵與信越期會擊羽信越不至  
帝大敗退守張良說帝捐關以東奔之二人信越始

引兵來是時帝猜忌之心已生矣觀其項羽方擒即馳入信壁奪其軍帝之急於制信可知呂后私審食其帝知之而不能制后亟欲竊柄惟信越是憚故乘猜忌之素心肆菹醢之慘毒而帝直信之而不以為非使信越與布三人而在后其敢王諸呂乎逮帝自將擊布致中流矢遂以病亡后與食其謀盡族諸將故不發喪使非酈商連兵還鄉之言則鋤劉王呂不待七年垂拱後矣然則后之醢信越由於帝之忌功臣也忌功臣所以信呂后也信呂后適以滅劉宗也然韓信雖云族滅考外史當信誅時有客匿其三歲兒知蕭何與信善謀於何作書與南粵趙佗佗養為子封之海濱姓韋韓之半也今其族有鄼侯所遺書受封所賜詔勒之鼎器呂后名雉字娥姁淮陰舍人名樂說告信欲詐赦諸官徒襲呂后太子信誅樂說封侯亦封侯

### 未央宮萬歲呼賈陳新語

未央宮帝命蕭何所治帝見其壯麗怒曰天下匈匈數歲成敗未可知何治宮室過度也何曰天子以四海為家非壯麗無以重威且無令後世有以加也上悅陸賈時為帝稱說詩書帝罵曰乃公居馬上得之安事詩書賈曰馬上得之寧可馬上治之乎帝曰試為我著秦所以失天下吾所以得之者及古成敗之國陸生乃祖述存亡之徵凡著十二篇每奏一篇帝未嘗不稱善左右呼萬歲號其書曰新語 未央宮在西安府西北一十四里內有東闕北闕前殿武庫遺址尚存

### 商雒間四老出黃綺功成

呂后生太子盈戚姬有寵生趙王如意帝以太子仁弱如意類已欲廢太子而立如意呂后使呂澤劫張良畫計良曰此難以口舌爭也顧上所不能致者四人曰東園公綺里季夏黃公角里先生宜請來令上見之固一助也呂后使太子為書卑辭安車迎此四人四人至會宴置酒太子侍四老從年皆八十餘鬚眉皓白衣冠甚偉帝怪問之四人各言姓名帝驚曰吾求公數歲公逃避我今何自從吾兒遊乎四老曰陛下輕士善罵臣等義不辱今聞太子仁孝恭敬天下莫不延頸故臣等來帝曰煩公幸卒調護太子太子竟不易皆留侯招此四人之力也四皓隱於商洛山中故謂之商山四皓 東園公姓袁名秉又一書云姓唐名宣明綺里季姓朱名暉字文季夏黃公姓翟名廓又一書云姓翟名廣字少通角里先生姓周

名術字元道綱目以綺里季夏一人黃公一人蓋杜甫詩有黃綺終辭漢之句以黃為氏也 角音六

### 大風歌思故鄉歎悲慨

帝擊誅英布還過沛置酒沛宮悉召故人父老諸母子弟佐酒道舊故為笑樂酒酣帝擊筑歌曰大風起兮雲飛揚威加海內兮思故鄉安得猛士兮守四方於是起舞慷慨傷懷泣下數行謂沛父兄曰吾雖都關中千秋萬歲後吾魂魄猶思沛其以沛為湯沐邑復其民世世無有所與

### 鴻鵠飛羽翼成愛子傷心

四皓侍太子宴出帝召戚夫人指視之曰我欲易之彼四人者輔之羽翼已成難動搖矣戚夫人泣上曰為我楚舞吾為若楚歌歌曰鴻鵠高飛一舉千里羽翼已就橫絕四海橫絕四海當可奈何雖有矰繳尚安所施歌數闋戚夫人噓唏流涕上起去罷酒

### 皇帝貴都長安叔孫婁敬

叔孫通說帝起朝儀采古禮與秦儀雜就之帝從之通遂徵魯諸生及帝左右與其弟子百餘人為綿蕞

野外習之月餘帝觀之曰吾能為此令羣臣肄習長樂宮成諸侯羣臣皆朝賀莫不振恐肅敬禮畢置法酒諸侍坐者無敢喧嘩失禮帝曰吾乃今日知為皇帝之貴也拜通為太常齊人婁敬成隴西過洛陽求見上曰洛邑天下之中有德易以王無德易以亡秦地披山帶河四塞以為固卒然有急百萬之眾可具此扼天下之吭而拊其背也帝即日車駕西都長安拜敬郎中賜姓劉氏 綿蕞置設綿索為習肄處蕞謂以茅剪樹地為蕞位尊卑之次 蕞乃蕞之俗寫音最

### 去賓天付社稷平勃王陵

上擊布時為流矢所中歸疾甚呂后問曰陛下百歲後蕭相國死誰令代之曰曹參問其次曰王陵可然少戇陳平可以助之平智有餘然難獨任周勃厚重少文然安劉氏者必勃也呂后復問其次曰此後亦非乃所知也遂崩在王位四年即帝位八年壽五十三葬長陵 周勃封絳侯王陵安國侯

### 廿一史彈詞註卷之三上

廿一史彈詞註卷之三

第三段下

漢惠帝相曹參七年垂拱

惠帝名盈高帝太子相國蕭何卒帝以曹參為相國  
 參舉事無所變更一遵何約束日夜飲醇酒參子窋  
 為中大夫帝怪參不治事使窋私問之參怒答窋曰  
 天下事非若所當言也至朝時帝讓參參曰陛下自  
 察聖武孰與高帝帝曰朕安敢望先帝臣孰與蕭何  
 賢帝曰君似不及也參曰高帝與蕭何定天下法令  
 既明今陛下垂拱參等守職遵而勿失不亦可乎帝  
 曰善參相三年百姓歌之曰蕭何為法較若畫一曹  
 參代之守而勿失載其清淨民以寧一帝在位止七  
 年謚法柔質慈民曰惠窋音竹曹參封平陽侯謚

懿曰

怡昇平遭母后柔輒寬仁

班固曰孝惠可謂寬仁之主遭呂太后虧損至德顧  
 氏曰惠帝仁柔之資童年嗣統一以清淨為治是時

呂后召帝觀人彘遂病歲餘不起使人請於太后曰此非人所為臣為太后子終不能治天下以此日飲為淫樂不聽政  
輒即俗軟字

### 投鳩酒暗傷殘趙王如意

呂后最怨戚夫人與子趙王如意乃囚戚夫人而召趙王使者三反趙相周昌不奉詔太后怒復召趙王來帝自迎入宮挾與起居飲食太后欲殺之不得問帝晨出射趙王少不能早起太后使人持鳩飲之

### 送淫刑人彘了戚氏夫人

呂后斷戚夫人手足去眼燿耳飲瘖藥使居廁中號曰人彘召帝觀之帝問知為戚夫人大哭遂病

### 雌太歲自臨朝鋤劉王呂

惠帝無子初呂后命張皇后取他人子養之而殺其母以為太子至是惠帝崩太子即位太后臨朝稱制女主當陽故謂雌太歲綱目以少帝非孝惠子於歲首註高皇后呂氏元年以其無統也太後欲立諸呂為王王陵曰高帝刑白馬盟曰非劉氏而王天下共擊之陳平周勃曰高帝定天下王子弟今太后稱制

王諸呂無所不可陵退讓平勃平勃曰今面折廷爭臣不如君全社稷定劉氏後君亦不如臣呂后乃立呂台為呂王台弟產為梁王后兄子祿為趙王先太后酖殺趙王如意徙淮陽王友為趙王復又幽殺趙王友徙梁王恢為趙王又酖殺恢愛姬恢自殺廢其嗣燕王建卒太后殺其子國除後昭帝詔曰諸呂陰謀大逆劉氏不絕如髮朱虛侯章侍宴為畊田歌曰深耕溉種立苗欲稀非其種者鋤而去之

### 賴北軍齊左袒撥轉人心

太后病甚令呂祿為上將軍居北軍產居南軍戒曰我崩大臣恐為變必據兵衛宮毋為人所制后崩諸呂欲為亂朱虛侯章以祿女為妻知其謀告其兄齊王襄遂發兵陳諸呂罪產等遣灌嬰擊之嬰與齊連和欲待諸呂變共誅之時太尉周勃不得主兵酈商老病子寄與祿善平勃使人劫商令寄給祿歸將印以兵屬太尉與大臣盟而之國祿猶豫未決會有以灌嬰與齊合告產且趣產入宮平陽侯曹窋聞之馳告平勃勃欲入北軍不得乃令襄平侯紀通持節矯內太尉復令寄說呂祿曰帝使太尉守北軍急歸印不然禍且起祿遂解印授勃勃入軍門令曰為呂氏右袒為劉氏左袒軍中皆左袒產不知祿已去北軍



迺入未央宮欲為亂勃與章逐產殺之因悉捕諸呂  
斬之遣章告齊王罷兵嬰亦罷歸昔人頗有以絳侯  
右袒之令為失計者按儀禮凡事無問吉凶皆左袒  
惟受刑則袒右故觀禮云右肉袒註云刑宜施於右  
是也以是知勃蓋以為呂氏則有刑故以右袒令之  
耳朱虛漢縣名故城在青州府臨朐縣東平陽府  
名屬山西 酈  
商封曲周侯

### 漢文帝德化民受言止輦

文帝名恒高帝中子薄姬所生初封代王惠帝無嗣  
大臣迎而立之帝恭儉仁慈專務以德化民每朝郎  
從官上書疏必止輦受其言未嘗  
不稱善 謚法慈惠愛人曰文

### 禦匈奴軍細柳按轡徐行

匈奴寇上郡雲中帝以將軍周亞夫次細柳劉禮次  
霸上徐厲次棘門以備之帝自勞軍至霸上及棘門  
軍直馳入已而之細柳軍軍士披甲銳兵彀弩帝先  
驅不得入曰天子且至軍門都尉曰軍中聞將軍令  
不聞天子詔帝至又不得入帝使使持節詔將軍吾  
欲入勞軍亞夫乃傳言開壁門門士請車騎曰將軍

約軍中不得馳驅帝乃按轡徐行至營亞夫持兵揖  
曰介冑之士不拜請以軍禮見帝改容式車使人稱  
謝皇帝敬勞軍成禮而去羣臣皆驚帝曰此真將軍  
矣曩者霸上棘門軍若兒戲耳其將固可襲而擄也  
拜亞夫為中尉 上郡今陝西綏德州雲中今大同  
府細柳霸上棘門皆地名細柳在西安府城西霸上  
在長安縣東棘  
門在咸陽縣東

### 惜露臺除肉刑痼瘼百姓

帝嘗欲作露臺召匠計之直百金帝曰百金中人十  
家之產吾奉先帝宮室尚恐羞之何以臺為齊太倉  
令淳于意有罪當刑其少女緹縈上書曰妾父坐法  
當刑妾思刑者不可復屬雖欲改過自新其道無由  
妾願沒為官婢以贖父罪帝憐之詔除肉刑帝詔丞  
相列侯吏二千石博士議有可以佐百姓者率意遠  
思無有所隱  
緹音啼

### 賜几杖却獻馬紅朽因陳

時吳王濞詐病不朝帝賜以几杖老不朝有獻千里  
馬者帝曰鸞旗在前屬車在後吉行日五十里師行

三十里朕乘千里馬獨先安之不受班固曰文帝清  
淨恭儉安養天下人給家足都鄙廩庾皆滿府庫餘  
貲財京師之錢累鉅萬貫朽而不可較太倉之  
粟陳陳相因充溢露積於外至腐敗不可食

### 漢景帝賴條侯刻平七國

景帝名啓文帝太子御史大夫鼂錯數言吳王濞有  
反謀宜削其地又言楚趙有罪皆削一郡膠西以賣  
爵事削六縣廷臣方議削吳吳遂反聞膠西王卬勇  
好兵面約之又發使約菑川王賢膠東王雄渠濟南  
王辟光楚王戊趙王遂皆反吳王罪狀鼂錯欲誅之  
因并楚兵攻梁梁城守睢陽初文帝戒太子曰即有  
緩急周亞夫真可任將至是帝拜亞夫爲太尉將兵  
擊吳楚屯滎陽時吳攻梁急帝使告救梁亞夫不奉  
詔而以輕騎絕吳楚兵後塞其饗道吳兵欲西梁城  
守不敢西即走漢軍亞夫堅壁不出吳楚士卒多飢  
死叛散乃引去亞夫追擊大破之濞走越越人殺之  
諸王皆伏誅膠西今山東膠州菑川縣名故城在  
青州府壽光縣西南膠東今萊州府即墨縣濟南府  
名睢陽屬開封府謚法布義行剛曰景亞夫周勃  
次子封條侯沛人

### 服朝衣斬東市鼂錯冤魂

初七國反以誅鼂錯爲名錯與吳相素盜不善盜因  
竇嬰入見於帝帝方與錯調兵食問之盜曰願屏左  
右帝屏人獨錯在盜曰臣所言人臣不得知乃屏錯  
盜曰吳楚相遺書言高帝王子弟今賊臣鼂錯擅適  
諸侯削奪其地以故反欲共誅錯復故地而罷今獨  
有斬錯復其故地則兵可無血刃而俱罷帝默然良  
久曰吾不愛一人以謝天下乃使中尉召錯給載行  
市錯衣朝衣斬東市僕射鄧公爲校尉以言軍事見  
帝帝曰鼂錯死吳楚罷否鄧公曰吳爲反數十歲矣  
以誅錯爲名其意不在錯也夫鼂錯患諸侯強大故  
請削之計畫始行卒受大戮內杜忠臣之口外爲諸  
侯報仇竊爲陛下不取也帝喟然曰公言善吾亦恨  
之鼂錯音朝曆史記註錯如字讀潁川人  
號智囊素盜字絲高陵人適音摘鄧公名先

### 貶中宮廢太子存心刻薄

皇后薄氏帝廢之太子名榮栗姬所生膠東王徹王  
夫人所生初長公主嫖欲以女嫁太子栗姬不許公  
主欲予徹王夫人許之由是公主日讒栗姬而譽徹  
之美帝亦賢之遂廢太子爲臨江王栗姬恚恨而死

臨江府名屬  
江西嫖音疋

### 置大哉顧尚席終害功臣

帝召周亞夫賜食獨置大哉無切肉又不置箸亞夫  
心不平顧謂尚席取箸帝曰此非不足君所乎亞夫  
免冠謝因趨出帝目送之曰此鞅鞅非少主臣也居  
無何亞夫子為父買工官尚方甲楯可葬者為人所  
告事連汙亞夫召詣廷尉亞夫曰臣所買器乃葬器  
也何謂反乎吏曰君縱不欲反地上即欲反地下以  
因不食死  
載音恣

### 漢武帝仗雄才改元建號

武帝名徹景帝太子帝雄才大畧聰明善斷即位  
始創年號為建元元年 謚法威彊睿德曰武

### 喜功名務廣地贖武窮兵

帝好大喜功開疆拓地北却胡南平粵朝夜郎降羌  
焚兵連不已饋運不休故財用奢靡而海內虛耗  
夜郎夸國名姓竹氏故阨在緜州北羌三  
苗之別裔焚古焚侯國今馬湖府屬四川

### 興禮樂舉孝廉明經策士

帝罷黜百家表章六經興太學正郊祀作音樂尚文  
章首策賢良方正之士即得廣川董仲舒為一代大  
儒從仲舒言令郡國舉孝廉各一人又定二千石不  
舉孝廉罪法更詔曰蓋聞導民以禮風之以樂其令  
禮官勸學興禮以為天下先於是公孫弘等請為博  
士置弟子五十人詣太常受業能通一藝以上補文  
學掌故秀才具等輒以名聞於時彬彬多文學之士  
矣 掌故治禮之官主故事者以有文學習禮儀者  
為之 漢太常博士弟子試射策中甲科補郎中乙科  
補掌故廣川今河間府景州 仲舒為江都膠西二  
相公孫弘字季淄  
州人封平津侯

### 任衛霍奪天山空了王庭

帝嘗過姊平陽公主家悅謳者衛子夫送入宮立為  
夫人尋立為皇后子夫同母弟衛青本姓鄭父季為  
縣吏給事平陽侯曹壽家與侯妾衛媼通而生青冒  
姓衛為侯家騎奴旋召為建章監侍中既而為大中  
大夫會匈奴右賢王侵擾朔方帝令青將兵擊之右  
賢王飲醉青夜至圍之右賢王潰圍北去得裨王十

餘人眾萬五千人畜數十百萬帝拜青為大將軍青  
姊子霍去病年十八為驃騎校尉斬捕首虜過當帝  
以去病為驃騎將軍使將萬騎擊匈奴轉戰六日過  
焉支山千餘里至祁連山渾邪王殺休屠王降帝又  
令青與去病各將五萬騎擊匈奴青出塞千餘里度  
幕至寘顏山去病出代右北平二千餘里封狼居胥  
山登臨瀚海兩軍出塞斬殺合八九萬是後匈奴遠  
遁而幕南無王庭矣青七擊匈奴爵大司馬大將軍  
長平侯去病六擊匈奴爵大司馬驃騎大將軍冠軍  
侯祁連山本名天山匈奴呼天為祁連故名王庭  
單于所都處無城郭穹廬前地若庭也焉支山在陝  
西行都司東南出臘脂後失之歌曰失我焉支山使  
我婦女無顏色奪我祁連山使我六畜不蕃息幕單  
于置廬帳地寘顏山即單于築城以居漢降將趙信  
處在韃靼國中右北平今直隸永平府狼居胥山在  
沙漠北瀚海大海名在火州柳陳城東沙漠之北羣  
鳥解羽伏乳於此休屠音朽諸衛青  
字仲卿謚曰烈去病謚景桓俱平陽人

### 求善馬任貳師遠征大宛

初帝使張騫通月氏歸言西域大宛多善馬因命使  
者相望於道以求之使言宛有善馬在貳師城匿不

肯與帝拜寵姬李夫人兄廣利為貳師將軍伐宛至  
宛圍其城宛殺其王母寡以降得善馬數十疋封廣  
利海西侯月氏匈奴號大宛西域國名貳師城在  
大宛國氏音支張騫字子文城固人封博望侯

### 泛樓船破南越彊弩將軍

初南越相呂嘉殺漢使及其王興更立建德為王發  
兵反帝遣伏波將軍路博德出桂陽樓船將軍楊僕  
出豫章擊之僕入越地先陷尋恆破石門待博德至  
俱進至番禺南越城守會募僕攻敗越人縱火燒城  
博德遣使招降黎旦城中皆降建德嘉已夜亡入海  
博德追得之以其地為南海珠崖等九郡博德後拜  
彊弩將軍南越是時兼廣東西貴州之地桂陽今  
郴州豫章今江西南昌府尋恆史記恆作陝地名在  
始興郡西石門山名在廣州府城西北番禺縣名屬  
廣州府九郡南海蒼梧鬱林合浦交趾九真日南珠  
崖儋耳南海今廣州蒼梧今梧州府鬱林州名屬梧  
州府合浦縣名屬廉州府交趾九真日南今俱屬安  
南珠崖今瓊州府崖州儋耳今儋州屬瓊州府

### 只可惜不封侯數竒李廣

文帝時李廣為武騎常侍嘗衝陷折關及格猛獸文  
帝曰惜乎子不遇時如當高帝時萬戶侯豈足道哉  
後為右北平太守匈奴號廣曰漢之飛將軍衛青北  
伐廣以前將軍自請居前青陰受帝誠以為廣老數  
奇毋令當單于不聽廣失道後期青使長史急責廣  
之幕府對簿廣謂不能復對刀筆吏遂自刎一軍皆  
哭百姓皆垂涕數奇言其運  
數不偶李廣隴西成紀人

### 孫李陵陷虜庭太史宮刑

李廣孫李陵為侍中善騎射愛人下士帝以為有廣之  
風拜騎都尉使與貳師將軍擊匈奴陵將步卒五千  
人為校尉所辱亡降匈奴具言陵軍無後救射矢且盡  
單于遂急攻陵陵曰無面目報陛下遂降帝怒問太  
史令司馬遷遷盛言陵提步卒不滿五千深踐戎馬  
之地却數萬之師雖古名將不過彼之不死宜欲得  
當以報漢也帝以遷為誣罔欲沮貳師為陵遊說下  
遷腐刑後蘇武歸陵語武曰陵雖驚怯令漢貴陵罪  
全其老母使得奮大辱之積志庶幾乎曹柯之盟此  
陵宿昔之所不忘也收族陵家為世大戮陵尚復何  
顧乎已矣令子卿知吾心耳陵泣下數行因與武訣

### 蘇子卿牧羝羊上林鴈帛

天漢元年帝遣中郎將蘇武與常惠使匈奴單于使  
漢降人衛律召武欲降之武不應律曰不聽吾計後  
雖欲復見我尚可得乎武曰汝為人臣子背主降虜  
何以汝見為律知武終不可脇白單于乃幽武置大  
窖中絕飲食天雨雪武卧齧雪與旃毛并咽之數日  
不死匈奴以為神乃徙武北海無人處使牧羝曰羝乳乃  
得歸別其官屬常惠等各置他所武既徙北海杖漢  
節牧羊卧起操持節旄盡落至昭帝元始六年壺衍  
鞬單于立國內乖離謀與漢和親漢使至求武等匈  
奴詭言武死常惠私教使者謂單于言天子射上林  
中得鴈足有繫帛書言武等在某澤中使者如惠語  
以讓單于單于驚謝乃歸武李陵置酒賀武曰足下  
揚名匈奴功顯漢室雖古竹帛所載丹青所畫何以  
過子卿武留匈奴凡一十九年始以強壯出及還鬚  
髮盡白蘇武字子卿  
杜陵人賜爵關內侯

### 汲黯臥淮陽戇直難容

汲黯始為謁者以數切諫遷為東海守東海大治召  
為主爵都尉黯為人性倨少禮面折不能容人之過

時帝方招文學黯曰陛下內多欲而外施仁義奈何  
欲效唐虞之治乎帝怒罷朝謂左右曰甚矣汲黯之  
戇也後民多鑄錢楚地尤甚上召拜黯為淮陽太守  
黯泣曰臣病不能任郡事臣願為中郎出入禁闥補  
過拾遺帝曰君薄淮陽耶顧淮陽吏民不相得吾徒  
得君之重卧而治之黯居淮陽十歲而卒淮陽今  
陳州屬開封府東海今海州屬  
淮安府汲黯字長孺濮陽人

### 尊異起李少君文成五利

方士李少君匿其年及生長善為巧發奇中言祠竈  
則致物丹砂可化為黃金壽可益蓬萊安期生之屬齊  
信之始親祠竈遣方士入海求蓬萊安期生之屬齊  
人少翁以鬼神方見帝帝所幸王夫人卒少翁以方  
夜致鬼如王夫人貌帝自帷中望焉乃拜為文成將  
軍方士樂大見帝曰臣常往來海上見安期羨門之  
屬曰黃金可成而河決可塞不死之藥可得仙人可  
致陛下必欲致之則貴其使者令為親屬以客禮待  
之則可使通言也乃拜大為五利將軍以衛長公主  
妻之蓬萊山相傳在東海中四面環以弱水乃仙  
人遊息之所安期生秦時賣藥海邊人言其千  
歲李少君遇之食以棗大如瓜少君字雲翼

### 樂巡遊募封禪耗費殃民

初司馬相如死遺書勸帝封泰山會得寶鼎乃令諸  
儒草封禪儀數年不成帝自制儀頗采儒術以文之  
以古者先振兵釋旅然後封禪乃於元封元年行自  
雲陽歷五原出長城北登單于臺至朔方臨北河勒  
兵十八萬騎旌旗徑千餘里還祭黃帝塚而釋兵又  
幸緱氏禮祭中嶽從官在山下聞若有言萬歲者三  
遂東巡海上祠八神還至奉高封泰山禮畢獨上泰  
山明日下陰道禪泰山下趾東北肅然山祠夜若有  
光晝有白雲出封中帝還坐明堂羣臣上壽下詔改  
元凡周行萬八千里二年方士公孫卿言見神人東  
萊山若云欲見天子於是幸東萊宿留數日無所見  
乃還祠泰山五年冬南巡江漢望祀虞舜又至泰山  
增封祀還郊泰時太初元年如泰山禪萬里望祀蓬  
萊天漢三年東巡幸泰山修封禪祀明堂還祀常山  
瘞元玉太始三年東巡郡瑯浮海而還時巡狩所  
過賞賜用帛百餘萬疋錢金以鉅萬計司馬公曰孝  
武窮奢極欲巡遊無度使百姓疲敝起為盜賊其異  
於秦始皇無幾矣緱氏漢縣故址在河南偃師縣  
南中嶽嵩山八神一天二地三兵四陰五陽  
六月七日八四時相如字長卿成都人

遣方士求神仙法行沈命

帝發船求蓬萊與方士傳車及間使求神仙者千數至是封泰山無風雨方士更言蓬萊諸神若將可得帝欣然庶幾遇之復東至海上欲自浮海求蓬萊東方朔諫乃還元封二年如東萊復遣方士求神怪采芝藥以千數太初元年自泰山東至海上考入海及方士求神仙者莫驗然益遣冀遇其真後帝對羣臣自歎曰時愚惑為方士所欺天下豈有仙人盡妖妄耳時帝專用酷吏吏民益輕犯法盜賊滋起帝使光祿大夫范昆等衣繡衣持節虎符發兵擊之數歲乃頗得其渠率然散亡聚黨無可奈何於是作沈命法曰盜起不發覺發覺而捕弗滿品二千石以下至小吏主者皆死其後小吏畏誅有盜不敢發上下相匿以文辭避法焉沈沒也敢避匿盜賊者沒其命東方朔字曼倩平原人率音帥

巫蠱與輪臺悔堯母名門

時方士及諸神巫多聚京師女巫往來宮中教美人度厄埋木人祭祀之更相告訐以為咒詛帝體不平江充與太子有隙因言帝疾祟在巫蠱帝以充治巫蠱獄充入宮云於太子宮得木人尤多太子懼遂收

充斬之因白皇后出武庫兵發長樂宮衛卒帝詔丞相劉屈氂收捕反者與太子戰太子敗南奔皇后自殺後太子自經死桑弘羊言輪臺東有溉田五千頃可遣屯田卒詣田所墾田築亭帝下詔深陳既往之悔二前有司奏欲益民賦助邊用是重困老弱孤獨也今又請遣卒田輪臺輪臺西於車師千餘里前擊車師以遼遠乏食死者尚數千人况益西乎乃者貳師敗軍士死畧離散悲痛常在朕心今又請遠田輪臺欲起亭隧是擾勞天下也朕不忍聞趙婕妤好居鉞弋宮任身十四月生皇子弗陵帝曰聞昔堯十四月而生今鉞弋亦然乃命其所生門曰堯母門輪臺在車師國西千餘里鉞弋宮婕妤好雙手反曲如鉞武帝親自披之遂伸故以名宮 釐音離 婕音接好音于女官名婕言接幸於上好美稱

漢昭帝儘聰明堪憐命夭

昭帝名弗陵武帝少子武帝以霍光為大司馬大將軍上官桀為左將軍受遺詔輔政桀為丁外人求封侯光不許桀怨之以燕王旦為帝兄不得立怨望遂與旦通謀詐令人為旦上書言光出都肄郎羽林道上稱蹕擅調益莫府校尉疑有非常侯光出沐日奏之桀欲從中下其事共執退光書奏帝不肯下明日

光聞之止畫室中詔召光入帝曰朕知是書詐也將  
軍調校尉未十日燕王何以知之且將軍為非何須  
校尉時帝年十四尚書左右皆驚而上書者果亡李  
德裕曰人君之德莫大於至明明以照奸則百邪不  
能蔽矣漢昭帝是也使天假之以年而又得伊呂之  
佐則成康不足侔矣惜乎享國不永壽二十二年崩  
出都肄郎羽林都大也肄習也郎與羽林皆宿衛之  
士言光出大閱試肄習郎羽林武備於道上稱蹕也  
畫室集覽曰先武帝畫周公負成王朝諸侯圖賜霍  
光今光止畫室有所倚也正誤曰謂彩畫之室非以  
賜光之圖又畫於室中也陳仁錫曰疑是漢大臣待  
罪之所即古畫地為牢之義伏青蒲詣請室可類推  
也謚法聖聞周達曰昭霍光  
字子孟去病異母弟謚宣成

### 昌邑王無德行不似人君

昭帝無嗣霍光迎武帝孫昌邑王名賀即位賀淫戲  
無度諫多不聽光憂懣以問大司農田延年延年曰  
將軍為國柱石審此人不可何不建白太后更選而  
立之光曰於古曾有此事否延年曰將軍若能行此  
即漢之伊尹也光乃率羣臣奏太后召王伏前聽詔  
尚書令讀奏曰昌邑王與喪服斬衰無悲哀之心發

樂府樂器擊鼓謠吹作俳倡與孝昭宮人蒙等淫亂  
太后曰悖亂如是耶復讀曰受璽二十七日使者旁  
午徵發凡一千一百二十七事荒淫迷惑失帝王禮  
誼恐危社稷不可以奉宗廟當廢太后詔曰可光脫  
其璽組扶王下殿送至昌邑邸光謝曰王行自絕於  
天臣寧負王不敢負社稷涕泣而去昌邑縣名屬  
萊州府延  
年字子賓

### 漢宣帝尚刑名兼王雜霸

宣帝初名病已更名詢武帝曾孫霍光等迎立之帝  
所用多文法吏以刑名繩天下太子仁柔好儒嘗侍  
宴言陛下持刑太深宜用儒生帝作色曰漢家自有  
制度本以霸王道兼之奈何純任德教用周政乎  
謚法聖善  
周聞曰宣

### 立中宮求故劍忠厚存心

公卿議立皇后皆心擬霍光女帝乃詔求微時故  
劍大臣知指白立許倜仔為皇后光女名成君

### 霍禹雲覆宗祀禍基驂乘



帝初立霍光子禹及兄孫雲山諸婿外孫根據於朝  
光妻顯復令女醫淳于衍毒皇后許氏而內已女為  
后及光卒帝拜子禹為右將軍封光兄孫山為樂平  
侯後霍氏驕侈縱橫帝頗聞殺許后事乃徙光諸婿  
收其印綬諸領羽林及兩宮衛將屯兵悉易以所親  
代之顯及禹雲山見日侵削怨望謀廢天子事覺雲  
山自殺禹腰斬顯及諸女昆弟皆棄市皇后霍氏廢  
處昭臺宮初帝謁見高廟霍光驂乘上從容肆體甚安近  
芒刺在背後張安世代光驂乘上從容肆體甚安近  
焉及光身死而宗族誅俗傳霍氏之禍始於驂乘  
安世字子孺  
封富平侯  
璜按司馬公曰顯禹雲山之罪雖應夸滅而光之忠  
勲不可不祀遂使家無唯類孝宣亦少恩哉朱青巖  
曰霍光為魏相飲恨光在不肖使相不能報光死即為危言以  
卜之顯禹母子輩又不肖使相不知禍由給事中魏  
以奉光祀溫公謂孝宣寡恩而不知禍由給事中魏  
相為丞相也其獄辭云霍氏怨相謀矯太后詔斬丞  
哉乃謂禍始驂乘不亦鑿乎前人無為此論者並錄  
以資論古  
之識云

### 楊惲誅寬饒刻太刻威刑

平通侯楊惲以太僕戴長樂告惲怨望免為庶人惲  
既失位家居治產業其友安定太守孫會宗以書戒  
之惲有材能少顯朝廷一朝見廢內懷不服報會宗  
書曰過大行虧長為農夫以沒世田家作苦歲時伏  
臘烹羊魚羔斗酒自勞酒後耳熱仰天擊缶而呼烏  
鳥其詩曰田彼南山蕪穢不治種一頃豆落而為其  
也人生行樂耳須富貴何時誠荒淫無度不知其不可  
書帝惡而斬之司隸校尉蓋寬饒剛直公清數犯上  
意時帝方用刑罰任中書宦官寬饒奏封事曰方今  
以刑餘為周召以法律為詩書又引易傳言五帝官  
天下三王家天下家以傳子孫官以傳賢聖書奏帝  
以寬饒怨謗下其書執金吾議以為寬饒意欲求禪  
大逆不道下寬饒吏饒引佩刀自剄北關下眾莫不  
憐之司馬公曰以孝宣之明而趙蓋韓楊之死其為  
善政之累大矣周官司寇之法有議賢議能若廣漢  
延壽之治民寬饒惲之剛直雖有死罪猶將宥之况  
罪不足以死不亦甚哉  
寬饒字次公魏人趙  
廣漢字子都昆吾人

增戶口集鳳凰循良奏效

膠東相王成勞來不倦流民自占八萬餘口賜爵關  
內侯穎川太守黃霸力行教化戶口歲增治為天下  
第一徵守京兆尹是時鳳凰集郡國穎川尤多又集杜陵  
京師神爵四年鳳凰數集郡國穎川尤多又集杜陵  
集新蔡胡氏曰宣帝之世鳳凰何為數來豈臣下窺  
見其微意故爭言祥瑞以侈耀之而帝亦以此自欺  
也歟以張敞所論鸚鵡者觀之亦可見矣帝起於閭  
閻稔知民瘼慎刺史守相之任重良二千石之寄凡  
二千石有治理效輒以璽書勉勵增秩賜金故漢世  
良吏於是為盛稱中興焉黃霸字次公陽夏人封  
建成侯

致中興思輔佐圖像麒麟

帝思股肱之美乃圖畫其人於麒麟閣法其形貌署  
其官爵姓名惟霍光不名曰大司馬大將軍博陸侯  
姓霍氏其次衛將軍富平侯張安世前將軍龍錐侯  
韓增後將軍營平侯趙克國丞相高平侯魏相丞相  
博陽侯丙吉太僕建平侯杜延年宗正陽城侯劉德  
少府梁邱賀太子太傅蕭望之典屬國蘇武凡十一

人皆以功德知名當世明著中興輔佐列於方叔召  
虎仲山甫焉博陸今平陸縣屬山西平陽府麒麟  
閣在西安府城內未央宮之左蕭何造以藏秘書宣  
帝圖畫功臣於此充國字翁孫上邽人謚曰壯魏  
相字弱翁定陶人丙吉字于陽又字少卿魯人  
梁邱賀字長翁瑯琊人望之字長倩蘭陵人

漢元帝重名儒優柔不斷

元帝名奭宣帝太子宣帝以蕭望之為前將軍周堪  
為光祿大夫受遺詔輔政宣帝崩太子即位是為元  
帝班彪曰元帝少而好儒及即位徵用儒生委之以  
政貢薛韋匡迭為丞相而牽制文義優游不斷孝宣  
之業衰焉尹起莘曰元帝繼統之初雖文景初政未  
有是也然反為基禍之主何哉優柔不斷戚宦用權  
也貢薛韋匡貢禹薛廣德韋元成匡衡謚法行  
義悅民曰元周堪字少卿貢禹字少翁瑯琊人廣德  
字長卿沛人元成字少翁丞相扶陽侯賢之子父子  
俱拜相封侯匡衡字稚圭東海人拜相對樂呂侯

遣王嬙嫁胡虜短見和親

齊國王穰女王嬙字昭君獻之元帝帝后宮多不得  
常見乃使畫工圖其形按圖召幸宮人多賂畫工昭

君自恃容貌獨不肯與工人乃醜圖之後匈奴呼韓  
邪單于入朝自言願婚漢氏以自親帝以昭君行召  
見貌為后宮第一帝悔之而名籍已定遂不復更乃  
按書工毛延壽樊青等俱棄市單于歸號昭君為寧  
氏胡關

### 漢成帝志荒淫溺情飛燕

成帝名騫元帝太子帝為太子時以好色聞及即位  
溺於酒色與張放等宴樂禁中荒淫媾黷嘗微行過  
陽阿公主家悅歌舞者趙飛燕召入大幸廢  
許后立飛燕為皇后 謚法安民立政曰成

### 忽天災眚禍水委棄宗祫

帝時災異迭見靡歲不有而天地變異有他時所絕  
無者八事兩月相承食震同日地震殿中隕石同時  
四月雪再桃李秋實雉集宮殿三日江竭杜欽谷永  
上言以為女寵太盛嫉妬專上將害繼嗣之咎王章  
劉向等上封事以為王氏外戚專政所致帝皆知而  
不能用惟溺於酒色自飛燕入宮之後有女弟合德  
復召入姿性尤醜粹左右見之皆嘖嘖嗟賞披香博  
上清方成在帝後唾曰此禍水也滅火必矣劉向以

王氏愈盛上封事極諫曰陛下守持宗廟而令國祚  
移於外戚縱不為身奈宗廟何 披香殿名宗祫一  
書易祫為臣指劉向為宗臣棄向言而不用也 谷  
永字子雲王章字仲卿為京兆尹劉向字子政本名  
更生楚元王四世孫唐貞觀中  
配享文廟宋祥符中封彭城伯

### 憂外戚勢逼君上書梅福

故南昌尉梅福上書曰方今君命犯而主威奪外戚  
之權日以益隆陛下不察其形願察其景自霍光之  
賢不能為子孫慮故權臣易世則危勢陵於君權隆  
於主然後防之亦亡及矣帝不納 南昌今江西南  
昌府福上書後及王莽專政一朝棄妻子去人傳以  
為仙後有見福於會稽者變姓名為吳市門卒 梅  
福字子真九  
江壽春人

### 請尚方斬馬劍折檻朱雲

太史安昌侯張禹雖家居每有大政必與定議時吏  
民上書言災異多切譏王氏帝至禹第示禹禹恐為  
所怨對曰災異深遠難見新學小生亂道宜無信用  
帝因此不疑王氏故槐里令朱雲上書求見曰願賜

尚方斬馬劍斷佞臣一人頭帝問誰也對曰張禹帝大怒曰小臣廷辱師傅罪死不赦御史將雲下雲攀殿檻檻折雲呼曰臣從龍逢比干遊於地下足矣未

### 漢哀帝建平初天星屢隕

哀帝名欣定陶王康子成帝無嗣立為皇太子即位改元建平元年正月隕石北地十六九月隕石於虞

### 嬖斷袖疎正言漢德頽傾

侍中董賢為人美麗和柔便辟得幸於帝常與帝臥起晝寢偏藉帝袖帝欲起賢未覺不欲動賢乃斷袖而起其恩愛至此帝為賢起大第北闕下窮極技巧賜東園秘器珠襦玉押無不備具貴震朝廷僕射鄭崇極諫帝遂數以職事責崇竟殺之欲賜賢爵關內侯丞相王嘉與御史大夫賈延切諫帝詔切責之竟

封賢高安侯欲發武庫兵送賢及乳母王阿舍執金吾母將隆奏言便辟弄臣而以天下公器給其私門非所以示四方帝不悅左遷為沛都都尉帝又託傳太后遺詔益封賢二千戶丞相新甫侯王嘉封還詔書切諫帝大怒下嘉獄殺之時賢年二十二帝以為大司馬衛將軍百官皆因賢奏事權侷人主朝野側目

### 漢平帝莽專權三綱絕矣

平帝名衍元帝庶孫中山王興之子哀帝無嗣召入為太子即位時年九歲以王莽為太傅號安漢公莽恐帝外家衛氏奪其權白太后拜帝母衛姬為中山孝王后賜帝舅寶鉉爵關內侯皆留中山不得至京師莽長子宇非莽隔絕衛氏私與衛寶通書教衛后上書求至京師莽不聽宇與師吳章等議以莽好鬼神可為變怪驚懼之因令歸政衛氏於是夜灑血莽第門吏發覺莽執宇送獄飲藥死盡滅衛氏支屬章腰斬莽因是獄連引素所惡者悉誅之元帝女弟敬武長公主素非議莽亦殺之漢忠直臣不附莽者何武鮑宣等皆坐死凡數百人北海逢萌謂友人曰三綱絕矣不去禍將及人即挂冠東都城門歸將家屬

浮海客於遼東 北海郡名今青州府  
謚法布綱治紀曰平逢萌字子慶昌邑人

### 酒杯中置毒藥矯假金滕

帝益壯以衛后故不悅莽因臘日上椒酒置毒酒中  
帝有疾莽作策請命於泰時願以身代藏策金滕救  
諸公莫敢言帝尋崩

### 擁立著漢嬰兒名為孺子

太后議立嗣時元帝世絕宣帝曾孫有見王五人列  
侯四十八人莽惡其長大曰兄弟不得相為後乃悉  
徵宣帝元孫選立廣戚侯顯之子嬰為皇太子號為  
孺子時嬰年二歲託以為卜相最吉故立之 廣戚  
漢縣名故城在徐州西北沛縣境內

### 攝皇帝陳符命篡了龍廷

前輝光謝囂奏武功長孟通浚并得白石有丹書文  
曰告安漢公莽為皇帝於是羣臣奏請安漢公踐祚  
服天子轂冕南面朝羣臣車服警蹕皆如天子制謂  
之攝皇帝自稱曰予平決朝事以皇帝之詔稱制居

攝元年太后詔莽朝見稱假皇帝三年扈雲言巴郡  
石牛臧鴻言扶風雍石莽皆迎到未央殿前莽奏臣  
與太保舜等視得銅符帛圖於石前文曰天告帝符  
臣莽敢不承用請號令天下奏事毋言攝以居攝三  
年為初始元年用應天命梓潼人哀章作銅匱為兩  
簡一署曰天地行璽一署曰赤帝行璽劉邦傳子黃  
帝金策昏時衣黃衣持匱至高廟付僕射以聞莽至  
高廟拜受金匱神禪還至未央宮前殿下書曰皇天  
上帝屬予以天下兆民赤帝漢高皇之靈承天命傳  
國金策之書予敢不欽受已御王冠即真天子位建  
有天下之號曰新以十二月朔為始建國元年使王  
舜請璽太后罵曰若自以金匱符命為新皇帝亦當  
自更作璽傳之萬世何用此亡國不祥璽為我漢家  
老寡婦旦暮且死欲以此璽俱葬舜言莽必欲得璽  
太后寧能終不與耶太后出璽投之地莽欲改太后  
漢家舊號張永獻符命言太皇太后當為新室文母  
莽從之策命孺子為安定公讀策畢莽親執孺子手  
獻欵曰昔周公攝位終得復子明辟今予獨迫皇天  
威命不得如意將孺子下殿北面稱臣凡與謀篡為  
符命者皆得封侯按金匱封拜其黨與為四輔三公  
四將凡十一公遣五威將王奇等十二人班符命四  
十二篇於天下王侯官吏皆授新印綬漢諸王為公

者悉上璽綬為民漢統至是中絕前輝光莽分京  
師置前輝光後承烈二郡梓潼縣名屬保寧府安定  
漢縣名故城  
在延安府

### 王莽亂十八年落頭威斗

王莽居攝二年年初始一年篡位始建國五年天鳳六  
年地皇四年共十八年初莽以五石銅鑄為威斗若  
北斗欲以厭勝眾兵司命負之出在前入在旁後更  
始遣王匡攻洛陽申屠建攻武關析人鄧尋開關迎  
建莽率羣臣至南郊陳具符命本末仰天大哭氣盡  
伏而叩頭諸生小民旦夕會哭哀者除為郎時諸縣  
大姓各起兵稱漢將長安旁兵四會城下爭欲先入  
城莽赦囚徒授兵殺豨與誓曰有不為新室者社鬼  
記之使史謀將之度渭橋皆散走眾兵發掘莽妻子  
父祖塚燒其棺槨及九廟明堂辟雍火照城中城中  
少年燒作室門火及掖庭承明莽避火宣室前殿火  
輒隨之莽紺袍服持虞帝七首旋席隨斗柄而坐曰  
天生德於予漢兵其於予何羣臣扶莽至漸臺眾兵  
上臺商人杜吳殺莽取其綬校尉公賓就斬其首軍  
人分裂莽身支解鬻分之居二日鄧尋申屠建入長  
安傳莽首詣宛縣於市百姓共提擲之或切食其舌

五石銅以五色藥石及銅為之長二尺五寸析今  
析川縣屬南陽府臺在池中水浸之故名漸臺宛今  
南陽府宣室未央宮前殿正室也齋則居之承明殿  
名紺深青而揚赤色初通作均戎事上下同服避  
著錄載韓玉汝家有王莽銅斗狀如勺今尺長一尺  
三寸其柄有銘曰大官乘輿十凍銅斗重三斤九兩  
新始建國天鳳上戊六年十二月工遵造第二十六  
料食器又南史載開元武湖於古塚得一銅斗有柄  
何承天謂此亡新威斗莽三公亡者賜之一在塚外  
一在塚內必甄邯之墓俄啓塚又得一斗有石銘大  
司徒甄邯墓則當時威  
斗有以賜大臣者矣

### 淮陽王號更始委柄庸人

春陵戴侯曾孫劉元在平林兵中號更始將軍時漢  
兵欲立劉氏以從人望南陽豪傑皆欲立劉續續光  
武之兄也新市平林將軍憚續威明貪元懦弱先共  
定策立元為皇帝大赦改元更始元年元納右大司  
馬趙萌女為夫人遂委政於萌日夜讌飲萌專權自  
恣羣小膳夫皆濫受官爵由是關中離心後光武即  
位詔封更始為淮陽王春陵城名在襄陽府棗陽  
縣南平林漢縣名故城在湖廣隨州東北新市在德

安府孝  
感縣

### 漢光武起南陽二十八宿

光武皇帝名秀長沙定王發之後景帝生發發生春  
 陵節侯買買三世徙封於南陽白水鄉改白水為春  
 陵買少子外生回回生欽欽生秀至是與宛人李通  
 等定謀起兵後得二十八將以定天下世謂之上應  
 二十八宿角木蛟太傅高密侯鄧禹胃土雉中山太  
 守全椒侯馬成亢金龍大司馬廣平侯吳漢昂日雞  
 河南尹阜成侯王梁氏土貉左將軍膠東侯賈復畢  
 月烏瑯琊太守祝阿侯陳俊房日兔建威大將軍好  
 時侯耿弇參水獺驃騎大將軍參議侯杜茂心月狐  
 執金吾雍奴侯寇恂甯火猴積弩將軍昆陽侯傅俊  
 尾火虎征南大將軍舞陽侯岑彭危月燕左曹合肥  
 侯堅鐔箕水豹征西大將軍陽夏侯馮異鬼金羊上  
 谷太守淮陵侯王霸斗木多建義大將軍高侯朱祐  
 柳土獐信都太守阿陵侯任光牛金牛征虜將軍穎  
 陽侯祭遵星日馬豫章太守中水侯李忠女土蝠驃  
 騎大將軍櫟陽侯景丹張月鹿大將軍槐里侯萬壽  
 虛日鼠虎牙大將軍安平侯蓋延翌火蛇太常靈壽  
 侯邳彤井木犴衛尉安成侯姚期軫水蚓驍騎將軍

昌成侯劉植室火猪東郡太守東光侯耿純璧水偷  
 城門校尉朗陵侯臧宮奎木狼捕虜將軍陽虛侯馬  
 武婁金狗驃騎將軍慎侯劉隆范蔚宗曰中興二十  
 八將前世以為上應二十八宿未之詳也然歲能感  
 會風雲奮其智勇稱為佐命亦各智能之士也長  
 沙府名諡法能紹前業曰光克定禍亂曰武鄧禹  
 字仲華新野人吳漢字子顏甫陽人賈復字君文南  
 陽人陳俊南陽人耿弇字伯昭寇恂字子翼昌平人  
 傅俊字子衛襄陽人岑彭字君然棘陽人堅鐔字子  
 伋襄陽人馮異字公孫父城人王霸字元伯潁陽人  
 李忠字仲都景丹字孫卿櫟陽人萬修茂林人蓋延  
 字巨卿漁陽人耿純字伯山臧宮字君翁馬武字張  
 子湖陽人祭遵  
 子弟孫潁陽人

### 戰昆陽誅王尋際會風雲

更始拜劉秀為偏將軍徇昆陽定陵鄧皆下之王莽  
 遣王尋王邑發兵平山東以長人巨無霸為壘尉又  
 驅諸猛獸以助威武漢兵皆走入昆陽惶怖欲散歸  
 諸城劉秀曰如欲分散勢無俱全時城中惟八九千  
 人秀使王鳳王常守昆陽夜與李軾出城收兵尋邑  
 縱兵圍昆陽秀至鄧定陵悉發諸營兵俱進自將步

騎千餘為前鋒尋邑遣兵合戰秀敗之諸將喜曰劉將軍見小敵怯今見大敵勇甚可怪也秀復進尋邑兵却諸部乘之秀從城西衝其中堅漢兵乘銳崩之遂殺尋莽兵大潰會大雷風屋瓦皆飛兩下如注湫川盛溢虎豹皆股戰士卒赴水溺死者萬數邑遁去盡獲其軍輜重於是豪傑響應皆殺其牧守自稱將軍用漢年號以待詔命昆陽故城在葉縣定陵在舞陽縣淦水在葉縣今因以名驛俱屬南陽鄧城屬府開封

### 痛親兄被傷殘獨居涕泣

新市平林諸將以劉縯兄弟威名益盛陰勸更始誅之縯步將劉稷勇冠三軍聞更始立怒曰本起兵圖大事者伯升兄弟也今更始何為者耶更始收稷誅之縯固爭並殺縯秀自父城馳詣宛謝縯官屬迎弔秀秀不與交私語惟深引過而已未嘗自伐昆陽之功又不敢為縯服喪飲食言笑如平常每獨居輒不御酒肉枕席有涕泣處伯升縯字父城漢縣名故城在南陽汝州東南

### 漢官儀幸再覩三輔巡行

更始將都洛陽以劉秀行司隸校尉使前修宮秀乃置僚屬作文移從事司察一如舊章時三輔吏士東迎更始見諸將過皆冠幘而服婦人衣莫不笑之及見司隸僚屬皆喜不自勝老吏或垂涕曰不圖今日復見漢官威儀由是識者皆屬心焉漢武以京兆馮翊扶風為三輔取輔車相依之意

### 滹沱河險些兒乘冰得渡

### 蕪荑亭麥豆粥患難君臣

更始以劉秀行大司馬事北徇薊會薊反應王郎秀趣駕而出至蕪荑亭時天寒冽馮異上豆粥晨夜兼行傳聞王郎兵在後至滹沱河候吏還白河水流漸無船不可濟秀使王霸視之恐驚眾乃詭曰冰堅可渡遂前至河河水亦合乃渡未畢數騎而冰解至南宮入道旁空舍馮異抱薪鄧禹蕪荑火秀對竈燎衣馮異復進麥飯馳赴信都後異治關中人上章言異威權日重百姓歸心帝以章示異異惶謝詔報曰將軍之於國家義為君臣恩猶父子何嫌何疑而有懼意至入朝帝謂公卿曰是我起兵時主簿也賜珍寶錢帛詔曰倉卒蕪荑亭豆粥滹沱河麥飯厚意久不報異謝曰願君無忘河北之難臣不敢忘巾車之恩



薊今順天府薊婁亭在真定府饒陽縣北亭亦在焉  
漳沱河源出太原府自鹵城縣從真定過霸州文安  
入海南宮縣名信都今冀州已上俱  
屬真定府中車鄉在汝州 婁音樓

### 擊銅馬推赤心關西投死

更始立秀為蕭王王擊銅馬諸賊於鄴銅馬食盡夜  
遁王追擊降之降者不自安王敕令各歸營勒兵自  
乘輕騎按行部陳降者更相語曰蕭王推赤心置人  
心腹中安得不投死乎由是皆服悉以降人分配諸  
將眾遂數十萬故關西號帝為銅馬帝 銅馬賊之  
號蕭今徐州蕭縣鄆縣名今省地理志鉅鹿有鄆縣

### 斬王郎燒文牒反側安心

莽時有自稱成帝子子與者莽殺之邯鄲卜者王郎  
詐稱真子與人多信之立郎為天子於邯鄲王將兵  
拔邯鄲斬王郎收郎文牒得吏民與郎交關謗毀者  
數千章會諸將燒之曰令反側子自安 邯鄲今廣  
平府 王郎名昌

### 豁達度重循良褒封卓

初隗囂起兵應更始徵至長安還歸天水聚眾自稱  
西州上將軍至是使馬援奉書洛陽見帝援曰今見  
陛下恢廓大度同符高祖乃知帝王自有真也歸語  
囂曰才明勇略非人敵也且開心見誠無所隱伏闊  
達多大節與高帝同宛人卓茂恬淡樂道哀平間為  
密令吏民親愛之及莽居攝免歸帝即位先訪求茂  
茂時七十餘詔曰名冠天下當受天下重賞今以茂  
為太傅封褒德侯司馬公曰光武即位之初羣雄競  
逐彼摧堅陷敵權畧之士方見重於世而獨能取忠  
厚之臣旌循良之吏置諸羣公之首其光復舊物享  
祚久長蓋由知所先務也 天水今鞏昌府  
秦州密縣名今屬開封府 卓茂字子康

### 嚴子陵同夜臥警動星文

帝少與嚴光同遊學及即位光變姓名隱遁帝以物  
色訪之齊國上言有一男子披羊裘釣澤中帝疑是  
光遣使聘之既至光卧不起帝即其卧所撫光腹曰  
咄咄子陵不可相助為理耶光乃張目曰昔唐堯著  
德巢父洗耳士固有志何至相逼乎帝曰子陵我竟  
不能下汝耶歎息而去復引光入論遊舊故因共偃  
臥光以足加帝腹上明日太史奏客星犯御坐甚急  
帝笑曰朕故人嚴子陵共卧耳除為諫議大夫不屈

乃耕富春山後人名釣處為嚴陵瀨焉  
光字子陵  
本姓莊後避明帝諱史記作嚴富春山在嚴州府桐  
廬縣西三十里號錦峰嶺前臨大江上有東西二  
釣臺咄音啜子陵小字狂奴新野人其妻梅福季  
女世傳子陵為餘姚  
人謬矣有古碣可考

### 三十萬青銅錢賞旌強項

董宣為雒陽令帝姊湖陽公主蒼頭白日殺人因匿  
主家及主出行以奴驂乘宣叱奴下車殺之主訴帝  
帝怒召宣欲箠殺之宣叩頭曰陛下聖德中興而縱  
奴殺人將何以治天下臣請自殺即以頭擊楹流血  
被面帝令小黄門持之使宣叩頭謝主宣不從強使  
頓之宣兩手據地終不肯俯主曰文叔為白衣時藏  
亡匿死吏不敢至門今為天子威不能行一令乎帝  
曰天子不與白衣同因救強項令出賜錢三十萬  
文叔光武字維本作洛光武以漢火德忌水改為維  
漢名奴為蒼頭董宣字少平陳留人湖陽公主名  
黃

### 百束匹郵憚布加貶東門

帝嘗出獵夜還上東門侯郵憚拒關不開帝令從者  
見面於門間郵曰火明燎遠遂不受詔帝乃回從中  
東門入明日憚上書諫曰陛下遠獵山林夜以繼晷  
如社稷宗廟何書奏賜憚布百疋貶中東門侯為參  
封尉雒陽城十二門按十二支每門侯一人司啓  
閉上東門者寅方門中東門者卯方門參封縣名  
郵憚字君  
章西平人

### 只可惜蕙苾讒伏波藁葬

交趾女子徵側徵貳反帝以新息侯馬援為伏波將  
軍討之斬側貳立銅柱為界後復遣征武陵蠻卒於  
軍虎賁中郎將梁松構陷之帝追收新息侯印綬初  
援在交趾常餌蕙苾寔能輕身勝瘴氣軍還載之一  
車及卒後有上書譖之者以為前所載還皆明珠文  
犀帝益怒援妻孥惶懼不敢以喪還舊塋藁葬城西  
前雲陽令朱勃上書訟之帝意始解新息今河南  
息縣武陵今常德府雲陽故城在涇陽縣西北馬  
援字文淵  
茂陵人

### 談時政太激切枉殺韓歆

大司徒韓歆好直言帝每不能容歆於帝前證歲將  
凶指天畫地言甚剛切免歸復遣使宣詔責之歆自  
殺歆素有重名死非其罪衆多不  
厭帝乃追賜錢穀以成禮葬之

### 廢郭后寵麗華皇儲易位

帝微時嘗曰任官當作執金吾娶妻當得陰麗華後  
竟得之至是以皇后郭氏寵衰廢之立陰氏為皇后  
太子疆以母廢意自不安郅惲說太子辭位願備藩  
國至是詔曰春秋之義立子以貴東海王陽皇后之  
子宜承大統皇太子疆崇執謙退願備藩國父子之  
情重久違之其以疆為東海王陽為皇太子改名莊

郭后名聖通  
廢為沛太后

### 易妻諷事不諧調笑朝廷

湖陽公主新寡帝與共論朝臣微觀其意主曰宋公  
威容德器羣臣莫及後大司空宋弘引見帝令主坐  
屏風後因謂宋曰諺云貴易交富易妻人情乎弘曰  
臣聞貧賤之交不可忘糟糠之妻不下堂帝顧謂主  
曰事不諧矣 宋弘字  
仲子長安人封宣平侯

### 信圖讖謫桓譚不無遺議

帝以赤伏符即位由是信用讖文多以決定嫌疑給  
事中桓譚諫曰凡人忽於見事而貴於異聞蓋諸巧  
慧伎數之人矯稱讖記以欺人主其事雖有時合譬  
猶卜數隻偶之類陛下宜屏斥之疏奏帝不悅會議  
靈臺所處帝謂譚曰吾欲以讖決之譚復極言讖之  
非經帝怒曰桓譚非聖無法將下斬之譚叩頭流血  
良久乃解出為六安丞道病卒 讖記之書曰符漢  
德尚火赤火色伏藏也赤伏符之名曰劉秀發兵捕  
不道四夸雲集龍鬪野四七之際火為主六  
安州名屬廬州府 桓譚字君山宿州人

### 保功臣謝西域終是賢君

帝欲完功臣爵土不令以吏職為過時列侯惟鄧禹  
李通賈復三侯與公卿參議國事餘俱以列侯就第  
故皆保其福祿無誅譴者先是西域苦匈奴重斂皆  
願屬漢莎車王賢鄯善王安皆遣使奉獻請置都護  
帝以中國新定不許後莎車王賢欲兼并西域諸國  
諸國懼車師等十八國俱遣子入侍願得都護帝以  
北邊未服皆還其侍子厚賞賜之西域諸國上書再  
請都護帝報曰今大兵未能得出如諸國力不從心

東西南北自在也尹氏曰西域數請都護不許則帝不勤遠畧之意見矣漢業鼎盛安宜哉莎車本西域之城名初單于別種呼屠萬年據之而自立後遂以莎車名國車師即姑師其國有前王後王

### 漢明帝念勲勞雲臺圖畫

明帝名莊原名陽光武帝太子帝思中興功臣乃圖二十八將於南宮雲臺又益以勲臣四人橫野大將軍山桑侯王常大司空固始侯李通大司空安豐侯竇融太傅宣德侯卓茂合三十二人馬援以椒房之親獨不與焉皇后所居以椒和泥塗壁取其温煖而芳故名椒房雲臺在河南府洛陽縣東水南堡王常字頽卿舞陽人

### 幸橋門拜更老偃武修文

帝幸辟雍初行養老禮以李躬為三老桓榮為五更禮畢引桓榮及弟子升堂帝自為辨說諸儒執經問難於前冠帶縉紳園橋門而觀聽者蓋億萬計時帝崇尚儒學自皇太子諸王侯及大臣子弟莫不受經自期門羽林之士悉令通孝經章句單于亦遣子入學知天地人三才曰三老知五行代謝者為五更

辟雍四門外水圍繞皆有橋觀者在水外故曰園橋門桓榮字春卿懷遠人

### 佛法像入中原金仙托夢

明帝夢見金人長大頂有日月光以問羣臣或曰西方有神其名曰佛陛下所夢得無是乎於是遣博士蔡愔等之天竺求佛法迎其書及沙門攝摩騰至京師得佛經四十二章緘之蘭臺石室以佛像繪之清涼臺顯節陵於是中國始傳其術而圖其形像焉此佛法入中原之始也天竺西域國名在大夏東南清涼臺在北鴈門郡外顯節陵即帝壽陵

### 取哀牢懷鄯善率土歸心

哀牢王柳貌率其民五萬餘戶內附其地置哀牢博南二縣帝遣耿秉竇固伐北匈奴固使假司馬班超使西域超行到鄯善鄯善王廣奉詔禮敬甚備後忽疎懈超曰此必有北虜使來乃詔侍胡詐之侍胡曰到已三日去此三十里超會其吏士因夜以火攻虜營斬其使召鄯善王廣以虜使首示之一國震怖廣叩頭願屬漢無二志遂納子為質哀牢國名今雲南永昌府鄯善即樓蘭國也去陽關千六百里漢昭

帝遣傅介子往刺其王更名其國為鄯善  
耿秉字伯初封羨陽侯班超字仲升

### 班虎頭通西域三十六國

班超起自書生家貧為官傭書以養母嘗投筆有萬里封侯之志有相者謂曰生燕頰虎頭飛而食肉萬里侯相也至是立功西域帝以超為軍司馬令遂前功復以超使于寘其王廣德亦殺匈奴使者以降諸國皆遣子入侍西域與漢絕者六十五載至是通者三十六國于寘西域國名寘音田

### 耿校尉困疏勒拜井泉生

奉車都尉竇固奏復置西域都護及戊己校尉遂以司馬耿恭為戊己校尉屯金蒲城北單于率二萬騎擊殺車師後王安得遂攻金蒲恭以疏勒城旁有澗水可固引兵據之北單于擁絕澗水城中穿井十五丈不得水吏士渴乏恭整衣服向井再拜有頃水泉湧出乃令吏士揚水以示單于單于以為神引去疏勒西域國名在莎車東北耿恭字伯宗

### 漢章帝尚寬仁慈祥長者

章帝名炆明帝太子時政尚嚴切尚書陳寵疏請濟之以寬帝納其言每事務於寬厚賀氏曰章帝書詔十六為愛民恤刑而發者十真仁慈之主哉范曄曰魏文帝稱明帝察察章帝長者章帝厭苛切事從寬厚平徭簡賦而又體之以忠恕文之以禮樂謂之長者不亦宜乎謚法温克令儀曰章

### 命曹褒修漢禮獎諭儒臣

博士曹褒請定文制著成漢禮太常巢堪言一世大典非褒所能定司馬班固以為宜廣集諸儒共議得失帝曰諺言作舍道旁三年不成會禮之家名為聚訟互生疑異筆不得下昔堯作大章一夔足矣乃拜褒侍中授以叔孫通漢儀十二篇曰此制散畧多不合經宜依禮條正使可施行褒依準舊典襟以五經識記之文撰次天子至於庶人冠婚吉凶終始制度凡百五十篇奏之帝以眾論難一故但納之不復令有司平奏曹褒字叔通

### 馬太后慎滿盈停封諸舅

馬太后伏波將軍馬援之女帝欲封爵諸舅太后不許時大旱言事者以為不封爵諸舅之故太后詔曰

昔王氏五侯同日俱封黃霧四塞不聞澍雨之應先帝防慎舅氏不令在樞機之位帝省詔悲歎復重請之太后報曰嘗觀富貴之家福祿重疊其根必傷夫至孝之行安親為上今數遭變異而欲先營外家之封違慈母之惓惓乎後三年帝封馬廖為順陽侯防為穎陽侯光為許陽侯太后聞之曰吾雖老戒之在得故日夜惕厲思自降損何意老志不從萬年之日長恨矣廖等辭讓帝不許乃受爵辭位皆以特進就第

### 除誹謗納正諫赦罪崔駰

魯國孔僖涿郡崔駰同遊太學相與論武帝始崇聖道號勝文景及後恣已忘其前善鄰房生梁郁上書告駰僖誹謗先帝事下有司僖等以書自訟曰凡言誹謗者謂實無此事而虛加誣之也至如孝武皇帝之美惡顯在漢史是為直說書傳實事非虛謗也今陛下乃欲為十世之武帝遠諱實事豈不異哉書奏詔勿問拜僖蘭臺令史

### 漢和帝禮賢才承家柔善

和帝諱肇章帝第四子胡致堂曰和帝幼冲即位誅鋤竇憲威權不失後十六七年間無大過舉尊信儒術友愛兄弟禮賢納諫中外又安方諸章帝實過之矣 謚法不剛不柔曰和

### 任中官尊外戚消長因循

時帝年十歲竇太后臨朝后兄竇憲以大將軍位在三公上專權僭逼遂生逆謀帝與宦官鄭眾謀誅之徐昭文曰夫害政亂國者非外戚則宦官也竇憲伏誅鄭眾因而封侯東漢之亂實基於此外戚宦官迭為消長馴致桓靈卒以亡漢可勝歎哉 中官外戚詳見下文

### 任竇憲擊匈奴燕然勒石

都鄉侯暢來弔國憂太后數召見竇憲恐分權遣客刺殺之太后怒憲懼因求擊北匈奴以贖罪戰於稽落山大破之出塞三千餘里登燕然山命中護軍班固刻石勒功紀漢威德固銘曰鑠王師兮征荒裔勦兇虐兮截海外覓其邈兮亘地界封神兵兮建隆碣熙帝載兮振萬世 都鄉縣名故城在涿州西北稽落山在燕然山南燕然山在單于速里烏地中

倚鄭眾芟大憝虎殪狼興

竇憲自北伐有功之後擅權自恣與鄧疊鄧磊及憲  
婿郭舉之父璜共為謀逆帝以朝廷上下莫不附憲  
獨中常侍鄭眾謹敏有心機遂與眾定議誅憲詔執  
金吾勒兵屯衛南北宮閉城門收璜舉磊誅之收  
憲大將軍印綬迫令自殺帝封眾為鄴鄉侯官者封  
侯始此胡致堂曰和帝年纔十四乃選用秘臣勒兵  
收捕朝廷肅清足以遠繼孝昭之烈矣所可恨者鄭  
眾以有大功於是開宦官用權之漸生中常侍亡漢  
之階諺曰前門拒虎後門進狼此之謂與顧氏曰和  
帝幼沖權在竇氏獨起宸斷殲厥大憝但鄭眾封侯  
似乎拒虎進狼耳

班孟堅人物志縱橫九等

班固字孟堅著漢書撰古今人物表曰譬如堯舜禹  
稷禹與之為善則行鯀鯀與之為惡則誅可與為  
善不可與為惡是謂上智桀紂龍逢比干欲與為善  
則誅于莘崇侯與之為惡則行可與為惡不可與為  
善是謂下愚齊桓公管仲相之則霸豎貂輔之則亂  
可與為善可與為惡是謂中人曰茲分聖人仁人智

人下愚為上上中上下中上中中中下下上下中  
下下縱橫以列九等之序究極經傳繼世相次總備  
古今之畧要云用修曰固作漢書紀漢事也洪荒以  
來非漢家之字上古羣佐非劉氏之臣乃總古今以  
著人表既以乖其名且表名古今而篇中  
不列漢人尤為不愜 班固扶風安陵人

著漢書未得就女弟嗣成

班彪續司馬遷後傳數十篇未成而卒明帝命其子  
固續之固以史遷所記乃以漢氏繼自王之末非其  
義也大漢當可獨立一史故上起高祖下終孝平下  
莽之誅十有二世二百三十年綜其行事撰十二帝  
紀八年表十本志七十列傳凡百篇逮上之十志未  
畢竇憲誅以固為竇氏賓客洛陽令种兢舊銜固捕  
擊之遂死獄中所著漢書未就詔固女弟昭踵而成  
之昭字惠姬為曹壽妻壽亡和帝召入宮令皇后貴  
人師事之號大家作女  
誠七章 班彪字叔皮

漢殤帝襁褓中權歸鄧后

殤帝名隆和帝長子有痼疾少子隆生纔百餘日鄧  
太后臨朝顧氏曰殤帝崩在襁褓鄧后終利幼弱

襁褓正義曰襁闊八寸長八尺用約小兒而負之行  
襁褓師古曰即今小兒被 謚法短折不成曰殤

### 坐龍牀八箇月葬入康陵

帝即位八月崩壽未二歲葬康陵綱目按質帝紀康  
陵在恭陵上而前漢平帝已名康陵或曰康與庚字  
相似或誤為康章懷詒云在慎陵  
塋中庚地合二說觀之當作庚陵

### 漢安帝邸第時頗多祥瑞

安帝名祐章帝廢太子清河孝王慶之子在邸時即  
有神光照室又有赤蛇盤於牀第之間 謚法賓客  
和平  
曰安

### 即位後母臨朝長統昌言

帝年十三即位後鄧太后臨朝十五年時以寇賊兩  
水策免太尉徐防司空尹勤仲長統昌言曰光武忿  
強臣之竊命矯枉過直政不任下雖置三公事歸台  
閣三公備員而已至於中世權移外戚寵被近習使  
陰陽失和永旱為災反以策讓三公至於死免豈不  
冤哉統嘗著論曰昌言其畧曰繼體之時貴有常家

乃騁其邪欲荒廢庶政親愛者盡佞諂之人寵貴者  
盡姬妾之家遂至熬天下之脂膏怨毒侵叛土崩瓦  
解至於運徙勢去猶不覺悟豈非富貴生不仁沈溺  
致愚疾耶治亂周復天道常然之大數也後獻帝朝  
荀彧舉為尚書令 仲長姓

### 楊伯起慎四知却金暮夜

弘農楊震字伯起孤貧好學諸儒為之語曰關西孔  
子楊伯起大將軍鄧騭辟之累遷荊州刺史東萊太  
守道經昌邑故所舉荊州茂才王密為昌邑令夜懷  
金十觔以遺震震曰故人知君君不知故人何也密  
曰暮夜無知者震曰天知地知我知子知何謂無知  
密愧而出 弘農今河南陝州荊州府名 屬湖廣  
東萊今萊州府昌  
邑縣名屬萊州

### 虞武都破西羌增竈行兵

諸羌反亂殘破并涼鄧太后聞虞詡有將帥畧以為  
武都太守擊羌眾數千遮詡於陳倉嶠谷詡停不  
進宣言上書請兵羌聞之乃分鈔傍縣詡因其兵散  
日夜進道兼行百餘里令吏士各作兩竈日增倍之



或問曰孫臏滅竈而君增之兵法日行不過三十里  
今行二百里何也詡曰羌衆多吾兵少徐行則易爲  
所及速進則彼所不測羌見吾竈日增必謂郡兵來  
迎孫臏見弱吾今示強勢有不同也既到郡兵不滿  
三千而羌衆萬餘攻圍赤亭詡令軍中強弩勿發潛  
發小弩羌以爲矢力弱并兵急攻詡乃使二十強弩  
共射一人發無不中羌大震圍解詡悉陳其兵衆從  
東郭門出北郭門入貿易衣服回轉數周羌不知其  
數更相恐動詡設伏掩擊大破之賊由是敗散一郡  
遂安武都今鞏昌府階州陳倉今鳳翔府寶雞縣  
嶠谷在河南永寧縣北赤亭在  
隴西縣虞詡字升卿武平人

### 親政事奉和熹尊崇乳媪

鄧太后號和熹皇后帝少聰明及長多不德不可太  
后意太后徵河間王子翼爲平原王勝後留京師帝  
乳母王聖常與中黃門李閏江京共毀短太后帝每  
忿懼及太后崩宮人誣告太后兄弟謀立平原王帝  
怒太后宗族俱免官沒入貲產太后兄鄧騭等皆自  
殺天下冤之尹氏曰帝親政之後追怒鄧氏譴責竄  
戮至於沒入貲產而怒猶未息必盡置死地而後已  
帝可謂少恩矣帝封李閏江京爲列侯與乳母王聖

聖女伯榮出入宮掖傳通姦賂司徒楊震疏請出阿  
母令居外舍聖等皆忿恚後封王聖爲野王君詔遣  
使者大爲王聖起第震又疏曰帑藏匱乏而爲阿母  
起第爲費巨億天下謹譁帝不聽衆等遂共構之夜  
遣使策收太尉印綬震飲醪而卒道路皆爲隕涕胡  
氏曰安帝三公無出震右者兩奏一乳媪而不能動  
至是極言遂取殺身之禍媪音女  
老稱也和熹后名鄧綏媪音襖  
璜按安帝親政後追怒太后則  
不得云奉和熹矣奉當作怒

### 東南巡至葉縣不得回京

延光三年二月帝東巡三月回宮四年二月南巡至  
葉縣崩於乘輿閻顯江京等以濟陰王在內恐公卿  
立之乃僞云帝疾甚徙御卧車馳歸  
四日至洛陽葉縣今屬南陽府

### 閻太后戀垂簾北鄉侯繼

安帝崩尊閻后爲皇太后太后欲久專政貪立幼年  
與閻顯等定策禁中迎章帝孫濟北惠王壽子懿即  
位懿時爲北鄉侯北鄉鄉名在  
濟南府長清縣安帝后名閻姬

襁褓中未七月遘疾而薨

璜按王季延彈詞序云用修間有疎漏漢安之迄漢順中遺北鄉侯是北鄉襁褓二十字當為延季增補矣今查史載北鄉侯是時年十歲在位七月病薨不在襁褓中也即此一事下筆便誤甚矣史學之難而不可修之才為用修之不及也

漢順帝十九侯迎來即位

北鄉侯薨閭顯白太后秘不發喪而更徵諸王子閉宮門屯兵自守中黃門孫程等十九人共斬江京等迎濟陰王保即位年十一是為順帝收顯誅之遷太后於離宮封孫程王康王國黃龍彭愷孟叔李建王成張賢史梁馬固王道李元楊柁陳予趙封李剛魏猛苗光十九人皆為列侯是為十九侯  
諡法慈和徧服曰順

抑忠良尊后黨地坼山崩

帝立貴人梁氏為皇后寵尊后黨以臣父商為人將軍商卒以商子梁冀為大將軍弟不疑為河南尹時

京師地震洛陽宣德亭地坼長八十五丈李固對策云乳母宋娥封山陽君裂土開國寔乖舊典梁氏子弟宜令權去外戚政歸國家帝以固為議郎阿母宦者皆疾之詐為飛章陷其罪出為洛令太尉龐參最為忠直數為左右所毀以災異皇甫規對策曰災異不息殆以姦臣權重所致軍冀弟兄宜增節謙節夫君者舟也將軍弟兄推轂者也如其怠弛將淪波濤冀忿之免歸凡忠良之士有恨於冀者皆中傷之是時年年地震金城隴西山崩涼州地自九月至十一月地百八十震山谷拆裂壞敗城寺民壓死甚眾

枉却了能直言埋輪風節

帝遣杜喬張綱等八使分行州郡表賢良顯忠勤其貪污有罪者刺史二千石驛馬上之墨綬以下便輒收舉喬等受命之部綱獨埋其車輪於雒陽都亭曰豺狼當道安問狐狸遂劾奏冀不疑以外戚蒙恩專肆貪饕仇害忠良書奏京師震竦帝雖知綱言直不能用張綱字文紀

聽中官養子襲爵賞何輕

帝德中官立已之功聽中官得以養子襲爵御史張  
綱上書曰文明二帝中官常侍賞賜裁滿數金頃者  
無功小人皆有官爵非所以愛民重器也書奏不省  
尹氏曰開府階誠宜蔭子謁者監何由有兒此唐李  
中敏書判語也而不知其源已始於漢夫天刑之人  
非有嗣續可傳而順帝乃聽以養子襲爵愛厚宦官  
欲其流澤蕃衍其如  
漢祚浸微浸滅何

### 冲一載質半年皇親跋扈

冲帝名炳順帝太子在位一年崩冲帝無嗣梁太后  
立渤海孝王之子纘是為質帝帝少聰慧嘗朝會日  
梁冀曰此跋扈將軍也冀深惡之使左右置毒於煮  
餅以進帝苦煩甚召宰輔李固曰朕食煮餅腹悶得  
水尚可活冀曰恐吐不可飲水語未絕而崩在位半  
年 渤海今滄州屬河間府 謚法幼小在位曰冲  
忠正無邪曰質

### 主威移君壽促敗在桓靈

時梁氏七侯三后六貴人三大將軍尚公主者三人  
卿相尹校五十七人冀專擅威柄幾二十年以私憾

設人甚多天子拱手劉陶有威柄下移之疏值冲質  
二帝連喪李固欲立清河王蒜冀以蒜嚴重乃迎立  
蠡吾侯志是為桓帝帝先為梁冀所制後與中常侍  
單超等定計誅冀即封超五人為列侯世謂之五侯  
兄弟嫫戚宰州臨縣虐徧天下與盜無異且海內人  
譽為宦官所嫉激成黨錮之禍流毒更烈桓帝崩無  
子立清河王曾孫宏是為靈帝聽宦官曹節王甫等  
殺大將軍竇武太傅陳蕃復治鉤黨錮及五屬一人  
逃死禍及萬家自言張常侍讓是我父趙常侍忠是  
我母以致黃巾作叛漢祚敗亡賀善曰靈帝信宦豎  
殺忠賢不知社稷之將覆人有恒言曰桓靈靈又甚  
於桓也 五屬屬族也謂斬衰齊衰大功小功總麻  
五服內之親蠡吾今保定府蠡縣 順帝后商女名  
梁妯桓帝后商女名梁女瑩鄧猛梁冀以為已女亦  
立為后是為三后

### 處士議秀才風攢成禍黨

自章帝以來有道之士多隱居不仕朝廷以處士徵  
聘多不就士論高尚其風桓帝初受學於甘陵周福  
及即位福為尚書同郡河南尹房植有名當朝鄉人  
謠曰天下規矩房伯武因師獲印周仲進二家賓客

互相譏端遂各樹朋徒漸成尤隙由是甘陵有南北  
部黨人之議自此始矣汝南太守宗資以范滂為功  
曹南陽太守成瑨以岑晊為功曹二郡謠曰汝南太  
守范孟博南陽宗資主畫諾南陽太守岑公孝弘農  
成瑨但坐肅太學諸生三萬餘人郭泰賈彪為其冠  
與李膺陳蕃王暢更相褒重學中語曰天下模楷李  
元禮不畏強禦陳仲舉天下俊秀王叔茂於是中外  
承風競以臧否相尚自公卿以下莫不畏其貶議時  
李膺為司隸校尉有張成善風角推占當赦教子殺  
人膺案殺之成素以方技交通宦官宦官教成弟子  
牢修上書告膺等養太學游士交結諸郡生徒共為  
部黨誹訕朝廷於是帝震怒逮捕黨人下膺等於黃  
門北寺獄辭連杜密陳翔陳寔范滂之徒二百餘人  
時黨獄所染皆天下名賢陳蕃極諫帝以蕃辟召非  
人策免之賈彪入洛陽說竇武霍諤使訟之帝意少  
解使中常侍王甫就獄訊之滂曰滂欲善善同其清  
惡惡同其污謂王政之所願聞不悟更以為黨甫改  
容為并解桎梏膺等又多引宦官子弟宦官懼請帝  
赦黨人歸田里書名三府禁錮終身伯武房植字  
仲進周福字孟博范滂字公孝岑晊字元禮李膺字  
仲舉陳蕃字叔茂王暢字甘陵今廣平府清河縣汝  
南今河南汝寧府郭泰字林宗賈彪字偉節為新

息長竇武字  
游平茂陵人

### 八顧廚八俊及復有三君

初膺等雖廢錮天下皆高尚其道更相標榜為之稱  
號以郭泰范滂尹勳巴肅宗慈夏馥蔡衍羊陟為八  
顧顧者言能以德行引人也度尚張邈王孝劉儒胡  
母班秦周蕃向王章為八廚廚者言能以財救人  
李膺荀昱杜密王暢劉祐魏朗趙典朱寓為八俊俊  
者言人之英也張儉翟超岑晊范康劉表陳翔孔昱  
檀敷為八及及者言其能導人追宗也竇武陳蕃劉  
淑為三君君者言一世所宗也張儉字元節濟寧  
人

### 誰得似申屠蟠超然評論

初范滂等非許朝政自公卿以下皆折節下之太學  
生爭慕其風以為文學將興處士復用申屠蟠獨歎  
曰昔戰國之世處士橫議列國之主至為擁篲先驅  
卒有坑儒焚書之禍今之謂矣乃絕跡於梁碭間因  
樹為屋自同傭人後滂等果罹黨禍惟蟠超然免於  
評論梁碭今徐州碭山縣蟠字子龍陳留人

生殺權憑官寺鬪起黃巾

桓帝崩陳蕃竇武用事復舉用李膺等及陳寶被殺  
宦官疾惡膺等每下詔書輒申黨人之禁侯覽怨張  
儉尤甚覽鄉人朱竝承覽意旨上書告儉與同鄉二  
十四人共為部黨圖危社稷詔捕儉等曹節因諷有  
司奏諸鈞黨者李膺等請下州郡考治時帝年十四  
問節等曰黨人何用為惡而欲誅之對曰欲為不軌  
帝曰不軌欲何如曰欲圖社稷帝乃可其奏凡黨人  
死者百餘人妻子皆徙邊天下豪傑及儒學有行義  
者宦官一切指為黨人睚眦之忿濫入黨中死徙廢  
禁者又六七百人司徒劉郃少府陳球尚書劉納衛  
尉楊球惡節等放縱節誣以交通書疏謀議不軌皆  
下獄死又怨諫議大夫劉陶前司徒陳耽皆誣陷死  
會黃巾賊張角兵起郎中張鈞上書曰張角所以作  
亂民所以附者皆由十常侍宗親典據州郡侵掠百  
姓故聚為盜賊宜斬十常侍以謝百姓大寇自消帝  
以章示十常侍皆免冠徒跣頓首詔皆冠履視事如  
故帝怒鈞曰此真狂子也因誣奏鈞學黃巾道收掠  
死獄中時宦者封謂徐奉等密與賊角為內應約以  
三月五日内外俱起角弟子唐周告之詔下冀州逐  
捕角初以妖術教授弟子轉相誑誘徒眾數十萬角

置三十六方大方萬餘人小方六七千人各立渠帥  
訛言歲在甲子天下大吉角知事露敷諸方俱起皆  
著黃巾為識角自稱天公將軍弟寶稱地公將軍梁  
稱人公將軍所在燔劫天下響應後中郎將盧植討  
破張角角死豫州刺史王允破黃巾得張讓賓客與  
黃巾交通書上之帝怒責讓而不能罪北地太守臯  
甫嵩討角與角弟梁寶戰皆破斬之帝以檻車詔植  
還徵王允下獄減死論罷嵩收還印綬以討張角功  
封張讓等十三人為列侯  
皇甫嵩字義真安定人

何國舅召外兵草來千里

靈帝崩皇子辨即位尊何后為皇太后以后兄進為  
大將軍中常侍蹇碩與趙忠等謀誅進中常侍郭勝  
進同郡人以告進進收碩誅之校尉索綯因說進悉  
誅宦官進白太后不許紹又為畫策召四方猛將使  
並引兵向京城以脅太后進然之召董卓卓時討羌  
賊即時就道上書請收張讓等讓知進召外兵圖已  
與段珪等率其黨數十人詐以太后詔誘進入嘉德  
殿伏兵斬進紹聞進被害引兵屯關下閉北宮門捕  
諸宦者無少長皆殺之讓等遂將帝與陳留王協出  
穀門公卿無從者惟尚書盧植及中部掾閔貢夜至

河上貢責讓等手斬數人讓懼投河死卓迎帝於北  
芒阪下時京師有千里草何青青之謠蓋以千里草  
合字為董也朱文公詩曰青青千里草乘  
時起陸梁北芒山名在河南府城北

### 廢弘農扶獻帝逼劫咸秦

卓迎帝與帝語語不可了更與陳留王協語無所遺  
失卓以協雖王美人所生為董太后所養自以與太  
后同族遂有廢立之意及帝還宮以卓為司空卓大  
會百僚曰皇帝闇弱不可奉宗廟遂廢帝為弘農王  
立陳留王協為帝是為獻帝卓自領前將軍加節鉞  
更封郡侯旋自為相國後山東州郡兵起卓欲徙都  
關中以避之時洛中貴戚室第相望卓放兵剽擄更  
收諸富室誅之沒入其財物驅徙餘民數百萬口於  
長安步騎驅蹙積屍盈路悉燒洛陽宮廟官府居家  
二百里內無復雞犬又使呂布發諸帝陵及公卿塚  
墓收其珍寶逼劫車駕西遷  
長安 謚法聰明睿智曰獻

### 袁本初抗虎威關東亡命

初董卓謀廢立謂袁紹曰天下之主宜得賢明董侯  
似可今欲立之紹曰今上富於春秋未有不善官於

天下今欲廢嫡立庶恐眾不從卓按劍叱紹曰豎子  
敢然爾謂我刀不利乎紹勃然曰天下健者豈惟董  
公引佩刀橫揖徑出逃奔冀州卓購求紹急周忌曰  
紹恐懼出奔今急購之勢必為變袁氏門生故吏徧  
天下若收聚徒眾山東非公有也卓即拜紹渤海太  
守紹在渤海是時豪傑欲起兵討卓者多歸心於紹  
焉 袁紹  
字本初

### 曹孟德散家財起義連盟

卓以曹操為驍騎校尉操謀誅卓被覺操變易姓名  
間行東歸至陳留散家財合兵得五千人與關東州  
郡起義討卓推袁紹為盟主 曹操字孟德本姓夏  
侯父嵩為中常侍曹騰養子其不復姓者因當時有  
以讖進者云古官職不言曹自漢名官盡為曹至  
史亦言屬曹卒亦言侍曹非天意乎遂不復姓

### 十八路眾諸侯無能討賊

曹操袁術孔紳韓馥劉岱王匡張邈喬瑁袁遺鮑信  
孔融張超陶謙馬騰公孫瓚張揚孫堅袁紹是為十  
八路諸侯共起兵討賊卓遷駕長安諸侯忌嫉離心  
俱各解散惟曹操追卓於滎陽敗還孫堅擊卓卓走

堅至洛陽修塞  
諸陵引還魯陽

### 王司徒連環計膏火臍燈

卓以王允為司徒允外相彌縫內謀王室屈意承卓  
中郎將呂布膂力過人卓愛之誓為父子然卓性剛  
褊嘗小失卓意拔手戟擲布布拳捷避免允素善待  
布布見允言狀允因以誅卓之謀告之布曰如父子  
何允曰君自姓呂本非骨肉擲戟之時豈有父子情  
耶布遂許之允使僕射士孫瑞書詔授布及卓入朝  
布令勇士十餘人偽著衛士服守北掖門卓入刺之  
卓傷臂墜車大呼呂布何在布曰有詔討賊臣應聲  
持矛刺卓趣兵斬之即出懷中詔以令吏士曰詔討  
卓耳餘皆不問置卓屍通衢卓體肥軍士以炷置卓  
臍中為燈光明照達膏流滿地百姓歌舞於道傳  
奇有玉連環記王允有義女貂蟬允以環賜之以蟬  
陽許呂布暗獻董卓布不平乘間入鳳儀  
亭與蟬語卓見之奪戟擲布史所不載

### 董卓死汜催來長安再亂

董卓既誅卓部將李催郭汜還至陝遣使求救不得  
乃相與結盟率軍西行與卓故部曲樊稠等舉兵入

長安呂布軍內反引催眾入城呂布戰不勝招王允  
同去允曰蒙社稷之靈上安國家允之願也如不獲  
則奉身以死弩力謝關東諸公勤以國家為念催等  
屯南宮掖門王允扶帝上宣平門催於城門下伏地  
曰董卓無故為呂布所殺臣等為卓報讐非敢為逆  
也表請王允出問太師何罪允下見之催等收允殺  
之催汜稠及張  
濟自為將軍

### 兩猜疑私戰鬪劫質公卿

催與汜稠矜功爭權催以稠勇而得眾忌之請稠會  
議於坐殺之由是諸將轉相疑貳催汜各治兵相攻  
催遂將兵圍宮以車三乘迎帝幸其營放兵入掠宮  
人御物放火燒宮殿官府居民悉盡帝使公卿和催  
汜汜留太尉楊彪等十人為質彪曰羣臣共鬪一人  
劫天子一人質公卿可乎汜將兵夜攻催門矢及帝  
帷催復移乘輿幸北塢催汜相攻連月張濟自陝西  
至欲和催汜遷帝權幸弘農帝思舊京車駕東出至  
新豐汜黨謀脅帝西行楊定董承將兵迎帝幸楊奉  
營至華陰濟與承奉不相平復與催汜合帝幸弘農  
催等共追帝大戰於東澗承奉軍敗百官士卒死者  
無算承奉詭與催連和而密遣使招故白波帥李樂

韓暹率眾來共擊催奉等復大敗乃奉帝渡河幸李樂營御牛車至安邑乘輿在棘籬中門戶無關閉帝又遣太僕韓融與催汜連和催乃放百官歸宮人奉暹奉帝東還雒陽時宮室燒盡百官披荆棘依牆壁間

### 操救駕效桓文移都入許

曹操在許謀迎天子眾以為山東未定韓暹等負功恣睢未可卒制荀彧曰昔晉文公納周襄王而諸侯景從今鸞輿旋軫東京榛蕪誠因此時奉天子以從人望大順也操自將兵詣洛陽既至引議郎董昭問計昭曰此中諸將人殊意異惟有移車駕幸許耳操曰此孤本志也乃奉車駕東遷始立宗廟社稷於許自是政歸曹氏天子守位而已許今開封府許州

### 自加官自進爵亂世奸雄

帝遷許昌操自為大將軍封武平侯尋自為丞相未幾復自立為魏公加九錫進位諸侯王上後自爵為王用天子車服出入警蹕初曹問汝南許劭曰我何如人劭曰子治世之能臣亂世之奸雄操喜而去

武平故城在開封府鹿邑縣東北九錫一輿馬二衣服三樂則四朱戶五納陛六虎賁七弓矢八鈇鉞九拒鬯許劭字子將平輿人好覈論鄉黨人物每月輒更品題故汝南俗有月旦評

### 挾天子令諸侯垂涎漢鼎

初曹辟毛玠為治中從軍玠曰夫兵義者勝宜奉天子以令不臣則霸王之業可成荀彧亦謂操因此時奉天子以從人望操從其策諸葛亮謂先主曰曹操擁百萬之眾挾天子以令諸侯誠不可與爭鋒捷錄曰曹操晚年用天子車服儼然與至尊無二乃至終身朶顛羊鼎曾不得染指焉豈其畏名義而不欲速哉

### 弒中宮殺皇子側目無君

董承女為貴人操誅承求貴人殺之帝以有姪請不得皇后伏氏懼與父完書令密圖操事泄操令郗慮持節策收皇后璽綬使尚書令華歆勒兵入宮收后后閉戶藏壁中歆壞戶廢壁就牽后出時帝在外殿后披髮徒跣行泣過訣帝顧謂慮曰天下寧有是耶遂將后下暴室以幽死所生二皇子皆酖殺之司馬



公曰以魏武之暴戾強仇其蓄無君之心久矣尹氏曰操殘忍桀逆遂至弑天下之母而不顧其兇威虐燄不在莽卓下伏后名壽后弑立操女節為后

### 擒呂布破張超橫行四海

初汜催之亂呂布自武關奔南陽依袁術又去術而從張揚於河內陳宮說陳留太守張邈與弟廣陵太守超共迎布為兗州牧以拒操時兗州郡縣皆應布布遂據濮陽操還攻之敗布於定陶斬布將薛蘭遂拔定陶布走投劉備於徐州張邈從之留弟超守雍邱操圍之邈為其下所殺雍邱潰超自殺後袁術攻備以爭徐州布襲備下邳取之備困降布布使備屯小沛布旋又攻備備走歸操操益其兵使東至沛收散兵以圖布布復遣高順等攻破沛城備單騎走荀攸勸操自擊布進至下邳布屢戰皆敗還保城操引沂泗灌城布困迫布將魏續等縛高順率眾降布登白門樓圍急乃下降布見操曰布將騎明公將步天下不足定也操命緩布縛備曰明公不見呂布事丁建陽董卓乎操遂縊殺之史稱其橫行中原芟刈羣雉幾平海內下邳今淮安府邳州雍邱今杞縣屬開封府

### 走袁術定劉表叱咤風雲

袁術以揚州牧僭帝號於壽春後資實空虛乃歸帝號於兄紹操遣劉備邀擊之術還走壽春歎曰袁術乃至是乎憤慨嘔血死劉表為荊州牧操擊之會表卒操至新野表子琮舉州降顏氏曰本初覆亡公路野死劉琮獻地張超身亡叱咤風生指顧電掃用軍行師變化若神壽春今壽州屬鳳陽府新野縣名屬南陽府

### 戰河北斬尚譚旋梟蹋頓

袁紹為大將軍督河北冀青幽并四州紹三子譚熙尚紹卒眾以譚長欲立之審配矯遺命立尚曹操攻黎陽尚譚敗走保鄴操將欲追之郭嘉曰袁紹愛此二子莫適立也今權力相侔急之則相保緩之則相爭變成而後擊之可一舉定也引還譚果引兵攻尚尚敗之譚奔平原尚圍之急譚請救於操操遂攻鄴拔之譚走南皮操復攻克之斬譚復背操操進攻平原以幽州降操熙與尚俱奔遼西烏桓時烏桓畧有漢民十餘萬戶蹋頓尤強為紹所厚欲助尚取故地操

進擊之令田疇為嚮道上徐無山塹山堙谷五百餘里經白檀平岡涉鮮卑庭東指柳城未至一百里虜乃知之尚熙與蹋頓等逆戰操登白狼山縱兵擊敗之斬蹋頓尚熙奔遼東公孫康斬之送首於操冀州屬真定府青州屬山東并州今太原府黎陽今濬縣屬大名府鄴今彰德府臨漳縣南皮縣今河間府遼西今永平府烏桓東胡國名蹋頓遼西烏桓別種名徐無山在順天府玉田縣東北白檀山名在順天府密雲縣南柳城漢縣名故城在永平府城西白狼山在幽州東北烏桓地中遼東今奉天府

### 爭漢中降張魯兵不留行

益州司馬張魯以劉璋闇弱遂據漢中操擊之至陽平魯弟衛率眾拒關堅守操攻陽平諸屯山峻難登欲還會前軍夜迷誤入衛別營營中大驚遂退散操進兵攻之衛等夜遁魯奔南山入巴中操遂定漢中魯尋降以為鎮南將軍益州今成都與雲南皆是漢中府屬陝西陽平關名在漢中府褒城縣西南山在保寧府城南一名跨鼇山巴今保寧府

### 任武勇有能人夏侯張許

操將軍夏侯惇與族弟淵勇冠三軍戰輒屢勝所在攻守操悉倚任而淵為尤勇操嘗戒之曰為將當有怯弱時不可但恃勇也呂布將張遼布死歸曹從征袁譚譚破別將破遼東賊還操自出迎引共載封盪寇將軍使鎮合肥以八百人先登陷陣斬孫權二將幾獲權拜征東將軍封晉陽侯譙國許褚勇力過人能逆拽牛尾軍中以其如虎而癡號曰虎癡曹操曰此吾樊噲也從征袁紹拜振威將軍嘗與馬超大戰謚壯侯

### 用文才多智士賈董荀程

武威人賈詡少時鬪忠異之謂有良平之奇先從張繡勸繡降曹表為執金吾操領冀州牧以為大中大夫軍國大事悉以諮之臨淄侯植有奪適之議操問於詡詡不對曰屬有所思問何思答曰思袁本初劉景升父子也太子遂定丕立以詡為太尉初操遣使請河內太守張揚假塗西至長安定陶人董昭說揚曰曹今雖弱實天下英雄也宜通其上事並表薦之昭更為操作書與李傕等致殷勤後操從荀彧策西迎天子董承拒之昭以楊奉兵強而少援作書與奉奉喜表操為鎮東將軍潛召操操乃將兵詣洛陽

引昭問計昭進以都許之策且曰行非常之事乃有非常之功操從之自是得肆行無忌操曰公仕才辦策畧真世之奇士也拜司徒穎川荀淑孫或舉孝廉何顥奇之曰王佐才也聞操有雄畧與從子攸歸之操與語大悅曰吾子房也以爲奮武司馬首進奉天子之策凡滅袁紹擒呂布定關中下荊州皆其設奇制勝算無遺策位侍中光祿大夫參軍事攸深密有智防操與語曰公遠非常人也吾得與計事天下尚何憂哉以爲軍師謀謀帷幄人莫知其言東阿人程昱先依兗州刺史劉岱岱爲黃巾所殺昱歸操操令守鄆城昱曰鄆城能戰之士不下萬人以將軍神武與文若昱等收而用之霸王之業可成也操從其言謀無不合初操與紹共起兵紹曰吾西據河北阻燕代南向以爭天下庶可濟乎操曰吾任天下之智力以善御之無所不可史稱操識拔奇才不拘微賤隨能任使皆獲其用武威今涼州衛董昭字公仕公達荀攸字景升劉表字文若荀彧字荀淑字季和許州人

### 好發塚巧立名摸金郎將

操特置發邱中郎將摸金校尉數十員天下塚墓無問新舊發掘骸骨暴露草野兇酷殘忍如此

### 偽爭劉教後代篡竊留心

孫權稱臣於曹陳說天命操以示外侍中陳羣等勸操正大位操曰若天命歸吾吾爲周文王矣陳明卿曰自此文王明使其子篡位也又註見後兒孫句下

### 西邊有漢中王擁兵蜀郡

劉備據有西蜀擊操敗之遂取漢中後立爲漢中王

### 東敗與孫討虜赤壁鏖兵

孫權據江東爲討虜將軍赤壁鏖兵註見四卷赤壁句下

### 想兼併力難加徘徊顧望

曹操素懷兼併之志軍四十萬攻吳相守月餘操見其舟船器仗軍伍整肅歎曰生子當如孫仲謀如劉景升兒子豚犬耳撤軍還後操取漢中張魯降主簿司馬懿曰劉備虜璋蜀人未附今克漢中益州震動進兵臨之勢必瓦解操曰人苦無足既得隴復望蜀耶引還法正說備曰操不因此時以圖巴蜀而留夏

侯淵屯守身遽北還此非其智不逮而力不足也舉眾往討必克漢中矣仲謀孫權字

### 觀山河不得已鼎足三分

初諸葛亮謂孫權曰將軍與劉豫州破曹則吳之勢強鼎足之形成矣顧氏曰元德仗鉞西南與北之魏東之吳宰割山河三分鼎峙

### 臨死向銅雀臺分香賣履

操作銅雀臺於鄴令寵妾居及病篤曰吾婕妤妓人時時登銅雀臺望吾西陵墓田餘香分與諸夫人諸舍中無所為學作履組賣可也操死為疑塚凡七十二處銅雀臺在彰德府臨漳縣治南上鑄大銅雀高一丈五尺置之樓頂

### 假慈悲將惡擔推與兒孫

司馬公曰操身後事孰大於禪代今操遺令家人婢妾無不處置而無一語及禪代事其意若曰禪代自是兒孫所為吾未嘗教為之是寔以天下遺子孫而身享漢臣之名也捷錄曰操遺令數百語不及禪代

意欲身受漢臣之榮而嫁篡逆之惡於子孫

### 漢獻帝可憐生一絲殘喘

### 沒巴鼻無倚靠寄命他人

帝自遷許以來守位而已左右侍御莫非曹氏之人操每以事入見殿中帝不任其懼因曰君若能相輔則厚不爾幸垂恩相捨後操使華歆牽伏后出后徒跣行泣而過執帝手曰不能復相活耶帝曰我亦不知命在何時

### 恰回首魏曹丕稱王劫禪

操卒子魏王丕立自為丞相冀州牧中郎將李伏太史丞許芝言魏當代漢見於圖緯魏羣臣因表勸丕篡位獻帝乃使御史大夫張音持節奉璽綬詔策禪位於丕

### 貶山陽流落做小可藩臣

丕廢獻帝為山陽公邑一萬戶自廢至薨又十四年太子早卒孫康立傳三世又七十五年迄晉永嘉末

始歿於羌氏國除山陽縣故城在河南  
懷慶府修武縣西北三十里一名濁鹿城

四百年漢家邦龍樓鳳閣

西漢二百一十年東漢一百九十五年

一場空單剩下兔跡狐塵

漢高祖怎生般五年滅楚

高祖年三十八起兵四十一破秦為王又五年四十六滅楚為帝

楚重瞳齊出力三載亡秦

楚漢共起兵凡三年滅秦

秦楚滅漢龍興二十四帝

前漢自高祖至孺子嬰凡十三帝後漢自光武至獻帝凡十二帝

轉回頭翻覆手做了三分

獻帝禪位昭烈即位與吳魏三分天下

前人創業非容易

後代無賢總是空

回首漢陵和楚廟

一般瀟灑月明中

落日西飛滾滾大江東去滔滔夜來今日又明朝驀地

青春過了千古風流人物一時多少英豪龍爭虎鬪

漫劬勞落得一場談笑西江月

明朝整頓調絃手

再有新文接舊文

廿一史彈詞註卷之三下





